



南斎書



リ 8
1735
105





U 8 特
1735
105

3

蕭子顯南齊書凡五十六篇總五十九卷

本紀八卷

志二十一卷

列傳四十卷



此係八年明治
月八年八月
牌由一人
所部以贈



南齊書總目

皇明崇禎十年歲在強圉赤奮若陽月望日琴川毛氏開雕

南齊書八紀十一志四十列傳合五十九篇梁蕭子顯撰始江淹已爲十志沈約又爲齊紀而子顯自表武帝別爲此書臣等因校正其訛謬而叙其篇目曰將以是非得失興壞理亂之故而爲法戒則必得其所託而後能傳於久此史之所以作也然而所託不得其人則或失其意或亂其實或析理之不通或設辭之不善故雖有殊功懿德非常之迹將闇而不章鬱而不發而禱杌鬼瑣姦回凶慝之形可幸而掩也嘗試論之古之所謂良史者其明必足以周萬事之理其道必足以適天下之用其智必足以通難知之意其文必足以發難顯之情然後其任可得而稱也何以知其然邪昔者唐虞有神明之性有微妙之德使由之者不能知知之者不能名以爲治天下之本號令之所布法度之所設其言至約其體至備以爲治天下之具而爲二典者推而明之所記者豈獨其

迹邪并與其深微之意而傳之小大精粗無不盡也本末先後無
不白也使誦其說者如出乎其時求其指者如卽乎其人是不可不
謂明足以周萬事之理道足以適天下之用智足以通難知之意
文足以發難顯之情者乎則方是之時豈特任政者皆天下之士
哉蓋執簡操筆而隨者亦皆聖人之徒也兩漢以來爲史者去之
遠矣司馬遷從五帝三王旣歿數千載之後秦火之餘因散絕殘
脫之經以及傳記百家之說區區掇拾以集著其善惡之迹興廢
之端又創己意以爲本紀世家八書列傳之文斯亦可謂竒矣然
而蔽害天下之聖法是非顛倒而采摭謬亂者亦豈少哉是豈可
不謂明不足以周萬事之理道不足以適天下之用智不足以通
難知之意文不足以發難顯之情者乎夫自三代以後爲史者如
遷之文亦不可不謂雋偉拔出之材非常之士也然顧以謂明不

足以周萬事之理道不足以適天下之用智不足以通難知之意
文不足以發難顯之情者何哉蓋聖賢之高致遷固有不能純達
其情而見之於後者矣故不得而與之也遷之得失如此況其他
邪至於宋齊梁陳後魏後周之書蓋無以議爲也子顯之於斯文
喜自馳騁其更改破析刻雕藻績之變尤多而其文益下豈夫材
固不可以強而有邪數世之史旣然故其事迹曖昧雖有隨世以
就功名之君相與合謀之臣未有赫然得傾動天下之耳目播天
下之口者也而一時偷奪傾危悖理反義之人亦幸而不暴著於
世豈非所託不得其人故邪可不惜哉蓋史者所以明夫治天下
之道也故爲之者亦必天下之材然後其任可得而稱也豈可忽
哉臣恂臣寶臣穆臣藻臣洪臣覺臣彥若若臣鞏謹序目錄昧死

上

南齊書目錄

第一卷

本紀一

高帝上

第二卷

本紀二

高帝下

第三卷

本紀三

武帝

第四卷

本紀四

鬱林王

第五卷

本紀五

海陵王

第六卷

本紀六

明帝

第七卷

本紀七

東昏侯

第八卷

本紀八

和帝

第九卷

志一

禮上

第十卷

志二

禮下

第十一卷

志三

樂

第十二卷

志四

天文上

第十三卷

志五

天文下

第十四卷

志六

州郡上

第十五卷

志七

州郡下

第十六卷

志八

百官

第十七卷

志九

輿服

第十八卷

志十

三

二

祥瑞

第十九卷

志十一

五行

第二十卷

列傳一

皇后

四

宣孝陳皇后

高昭劉皇后

武穆裴皇后

文安王皇后

鬱林王何妃

海陵王王妃

明敬劉皇后

東昏褚皇后

和帝王皇后

第二十一卷

列傳二

文惠太子

第二十二卷

列傳三

豫章文獻王

第二十三卷

列傳四

褚淵

淵弟澄
徐嗣

王儉

第二十四卷

列傳五

柳世隆

張瓌

第二十五卷

列傳六

垣崇祖

張敬兒

第二十六卷

列傳七

王敬則

陳顯達

第二十七卷

列傳八

劉懷珍

李安

王玄載

弟玄逸

第二十八卷

列傳九

崔祖恩

劉善明

蘇侃

垣榮祖

第二十九卷

列傳十

五

呂安國

全景文

周山圖

周盤龍

王廣之

第三十卷

列傳十一

薛淵

戴僧靜

桓康

焦度

曹虎

第三十一卷

列傳十二

江謐

荀伯玉

第三十二卷

列傳十三

王琨

張岱

褚炫

何戢

王延之

阮韜

第三十三卷

列傳十四

王僧虔

張緒

第三十四卷

列傳十五

虞玩之

劉休

沈沖

庾杲之

王湛

第三十五卷

列傳十六

高祖十二王

臨川獻王映

南齊書目錄

長沙威王光

武陵昭王暉

安城恭王暕

鄱陽王鏘

桂陽王鐸

始興簡王鑑

江夏王鋒

南平王銳

宜都王鑑

晉熙王球

河東王鉉

第三十六卷

列傳十七

謝超宗

劉詳

第三十七卷

列傳十八

到撫

劉俊

虞棕

胡諧之

第三十八卷

列傳十九

蕭景先

蕭赤斧

子穎胃

第三十九卷

列傳二十

劉歊

弟璉

劉歊

陸澄

第四十卷

列傳二十一

武帝一十七王

竟陵文宣王子良子肅

廬陵王子卿

魚復侯子響

安陸王子敬

晉安王子懋

隨郡王子隆

建安王子真

西陽王子明

南海王子罕

巴陵王子倫

邵陵王子貞

臨賀王子岳

西陽王子文

衡陽王子峻

南康王子琳

湘東王子建

南郡王子夏

第四十一卷

列傳二十二

張融

周顥

第四十二卷

列傳二十三

王晏

蕭湛

蕭坦之

江祐

第四十三卷

江斡

何昌寓

謝瀹

王思遠

第四十四卷

徐孝嗣

沈文季

列傳二十四

列傳二十五

第四十五卷

宗室

衡陽元王道度

始安貞王道生

安陸昭王緬

第四十六卷

王秀之

王慈

蔡約

陸慧曉

蕭惠基

第四十七卷

列傳二十六

遜光 遜欣 遜昌

列傳二十七

七

列傳二十八

王融

謝朓

第四十八卷

列傳二十九

袁彖

孔稚珪

劉繪

第四十九卷

列傳三十

王奐

從弟繪

張沖

第五十卷

列傳三十一

文二王

巴陵王昭秀

桂陽王昭粲

明七王

巴陵隱王寶義

江夏王寶玄

廬陵王寶源

鄱陽王寶寅

邵陵王寶攸

晉熙王寶嵩

桂陽王寶貞

第五十一卷

列傳三十二

裴叔業

崔慧景

張欣泰

第五十二卷

列傳三十三

文學

丘靈鞠

檀超

卞彬

丘巨源

王智深

陸厥

崔慰祖

王竣之

祖冲之

賈淵

第五十三卷

列傳三十四

八
大尾

良政

傅琰

虞愿

劉懷慰

裴昭明

沈憲

李珪之

孔琇之

第五十四卷

列傳三十五

高逸

褚伯玉

明僧紹

顧歡

臧榮緒

何求

劉蚪

庾易

宗測

杜京產

沈麟士

吳苞

徐伯珍

第五十五卷

列傳三十六

孝義

崔懷慎

公孫僧遠

吳欣之

韓係伯

孫淡

華寶

韓靈敏

封延伯

吳達之

王文殊

通鑑目錄

朱謙之

蕭叡明

樂頤

江泌

杜栖

陸絳

第五十六卷

列傳三十七

倖臣

紀僧真

劉係宗

茹法亮

呂文顯

呂文度

第五十七卷

列傳三十八

魏虜

第五十八卷

列傳三十九

蠻

東南夷

第五十九卷

列傳四十

芮芮虜

河南氏羗

南齊書卷一

本紀第一

高帝上

太祖高皇帝諱道成字紹伯姓蕭氏小諱鬪將漢相國蕭何二十四世孫也何子鄩定侯延生侍中彪彪生公府掾章章生皓皓生仰仰生御史大夫望之望之生光祿大夫育育生御史中丞紹紹生光祿勳閔閔生濟陰太守闡闡生吳郡太守永永生中山相苞苞生博士周周生蛇丘長矯矯生州從事達達生孝廉休休生廣陵府丞豹豹生太中大夫裔裔生淮陰令整整生卽丘令儁儁生輔國參軍樂子宋昇明二年九月贈太常生皇考蕭何居沛侍中彪免官居東海蘭陵縣中都鄉中都里晉元康元年分東海爲蘭陵郡中朝亂淮陰令整整字公齊過江居晉陵武進縣之東城里寓

西川中鳳閣
氏雷而開法

居江左者皆僑置本土加以南名於是爲南蘭陵蘭陵人也皇考諱承之字嗣伯少有大志才力過人宗人丹陽尹摹之北兗州刺史源之竝見知重初爲建威府參軍義熙中蜀賊譙縱初平皇考遷揚武將軍安固汶山二郡太守善於綏撫元嘉初徙爲威烈將軍濟南太守七年右將軍到彥之北伐大敗虜乘勝破青部諸郡國別帥安平公乙旃眷寇濟南皇考率數百人拒戰退之虜衆大集皇考使偃兵開城門衆諫曰賊衆我寡何輕敵之甚皇考曰今日懸守窮城事宜危急若復示弱必爲所屠惟當見彊待之耳虜疑有伏兵遂引去青州刺史蕭思話欲委鎮保險皇考固諫不從思話失據潰走明年征南大將軍檀道濟於壽張轉戰班師滑臺陷沒兗州刺史竺靈秀抵罪宋文帝以皇考有全城之功手書與都督長沙王義欣曰諱理民直亦不在武幹後今擬爲兗州刺史

檀征南詳之皇考與道濟無素故事遂寢遷輔國鎮北中兵參軍員外郎十年蕭思話爲梁州刺史皇考爲其橫野府司馬漢中太守氏帥楊難當寇漢川梁州刺史甄法護棄城走思話至襄陽不進皇考輕軍前行攻氏僞魏興太守薛健於黃金山尅之黃金山張魯舊戍南接漢川北枕驛道險固之極健旣潰散皇考卽據之氏僞梁秦二州刺史趙溫先據州城聞皇考至退據小城薛健退屯下桃城立柴營皇考引軍與對壘相去二里健與僞馮翊太守蒲旱子悉力出戰皇考大破之健等閉營自守不敢出思話繼至賊乃稍退皇考進至峨公山爲左衛將軍沙州刺史呂平大衆所圍積日建武將軍蕭汪之平西督護段蚪等至表裏奮擊大破之難當又遣息和領步騎萬餘人夾漢水兩岸援趙溫攻逼皇考相拒四十餘日賊皆衣犀甲刀箭不能傷皇考命軍中斷槊長數尺以大

斧搥其後賊不能當乃焚營退皇考追至南城衆軍自後而進連戰皆捷梁州平詔曰諱稟命先驅蒙險深入全軍屢尅奮其忠果可龍驤將軍隨府轉寧朔司馬太守如故入爲太子屯騎校尉文帝以平氏之勞青州缺將欲授用彭城王義康秉政皇考不附乃轉爲江夏王司徒中兵參軍龍驤將軍南泰山太守封晉興縣五等男邑三百四十戶遷右軍將軍元嘉二十四年殂年六十四梁土民思之於峨公山立廟祭祀昇明二年贈散騎常侍金紫光祿大夫太祖以元嘉四年丁卯歲生姿表英異龍顏鍾聲鱗文遍體儒士雷次宗立學於雞籠山太祖年十三受業治禮及左氏春秋十七年宋大將軍彭城王義康被黜鎮豫章皇考領兵防守太祖舍業南行十九年竟陵蠻動文帝遣太祖領偏軍討沔北蠻二十一年伐索虜至丘檻山竝破走二十三年雍州刺史蕭思話鎮襄

陽啟太祖自隨戍沔北討樊鄧諸山蠻破其聚落初爲左軍中兵參軍二十七年索虜圍汝南戍主陳憲臺遣寧朔將軍臧質安蠻司馬劉康祖救之文帝使太祖宣旨授節度聞虜主拓跋燾向彭城質等回軍救援至盱眙太祖與質別軍主胡宗之等五軍步騎數千人前驅燾已潛過淮卒相遇於莞山下合戰敗績緣淮奔退宗之等皆陷沒太祖還就質固守爲虜所攻圍甚危急事寧還京師二十九年領偏軍征仇池梁州西界舊有武興戍晉隆安中沒屬氏武興西北有蘭臯戍去仇池二百里太祖擊二壘皆破之遂從谷口入關未至長安八十里梁州刺史劉秀之遣司馬馬注助太祖攻談堤城拔之虜僞河間公奔走虜救兵至太祖軍力疲少又聞文帝崩乃燒城還南鄭襲爵晉興縣五等男孝建初除江夏王大司馬參軍隨府轉太宰遷貞外郎直閣中書舍人西陵王撫

軍參軍建康令新安王子鸞有盛寵簡選僚佐爲北軍中郎中兵參軍陳太后憂起爲武烈將軍復爲建康令中兵如故景和世除後軍將軍直明帝立爲右軍將軍時四方反叛會稽太守尋陽王子房及東諸郡皆起兵明帝加太祖輔國將軍率衆東討至晉陵與賊前鋒將程桿孫曇確等戰一日破賊十二壘分軍定諸縣晉陵太守袁標棄城走東境諸城相繼奔散徐州刺史薛安都反彭城從子索兒寇淮陰山陽太守程天祚舉城叛徐州刺史申令孫又降徵太祖討之時太祖平東賊還又將南討出次新亭前軍已發而索兒自睢陵渡淮馬步萬餘人擊殺臺軍主孫耿縱兵逼前軍張永營告急明帝聞賊渡遽追太祖往救之屯破釜索兒向鍾離永遣寧朔將軍王寬據盱眙遏其歸路索兒擊破臺軍主高道慶走之於石鼈將西歸王寬與軍主任農夫先據白鵠澗張永遣

太祖馳督寬索兒東要擊太祖使不得前太祖鼓行結陣直入寬壘索兒望見不敢發經數日索兒引軍頓石梁太祖追之至葛冢候騎還云賊至太祖乃頓軍引管分兩馬軍夾營外以待之俄頃賊馬步奄至又推火車數道攻戰相持移日乃出輕兵攻賊西使馬軍合擊其後賊衆大敗追奔獲其器仗進屯石梁澗北索兒夜遣千人來斫營營中驚太祖臥不起宣令左右案部不得動須臾賊散太祖議欲於石梁西南高地築壘通南道斷賊走路索兒果來爭之太祖率軍擊破之賊馬自相踐藉死索兒走向鍾離太祖追至黠黠而還除驍騎將軍封西陽縣侯邑六百戶遷巴陵王衛軍司馬隨鎮會稽江州刺史晉安王子勛遣臨川內史張淹自鄱陽嶠道入三吳臺軍主沈思仁與僞龍驤將軍任皇鎮西參軍劉越緒各據險相守明帝遣太祖領三千人討之時朝廷器甲皆充

南討太祖軍容寡闕乃編椹皮爲馬具裝析竹爲寄生夜舉火進軍賊望見恐懼未戰而走還除桂陽王征北司馬南東海太守行南徐州事初明帝遣張永沈攸之以衆喻降薛安都謂太祖曰吾今因此北討卿意以爲何如太祖對曰安都才識不足狡猾有餘若長轡緩御則必遣子入朝今以兵逼之彼將懼而爲計恐非國之利也帝曰衆軍猛銳何往不尅卿每杖策幸勿多言安都見兵至果引率虜永等敗於彭城淮南孤弱以太祖爲假冠軍將軍持節都督北討前鋒諸軍事鎮淮陰泰始三年沈攸之吳喜北敗於睢口諸城戍大小悉奔歸虜遂退至淮北圍角城戍王賈法度力弱不敵諸將勸太祖渡岸救之太祖不許遣軍主高道慶將數百張登浮艦淮中遙射城外虜弩一發數百箭俱去虜騎相引避之乃命進戰城圍卽解遷督南兗徐二州諸軍事南兗州刺史持節

假冠軍督北討如故五年進督兗青冀三州六年除黃門侍郎領越騎校尉不拜復授冠軍將軍留本任明帝常嫌太祖非人臣相而民間流言云蕭諱當爲天子明帝愈以爲疑遣冠軍將軍吳喜以三千人北使令喜留軍破釜自持銀壺酒封賜太祖太祖戎衣出門迎卽酌飲之喜還帝意乃悅七年徵還京師部下勸勿就徵太祖曰諸卿聞於見事主上自誅諸弟爲太子稚弱作萬歲後計何關佗族惟應速發事緩必見疑今骨肉相害自非靈長之運禍難將興方與卿等戮力耳拜散騎常侍太子左衛率時世祖以功當別封贛縣太祖以一門二封固辭不受詔許之食邑二百戶明帝崩遺詔爲右衛將軍領衛尉加兵五百人與尚書令袁粲護軍褚淵領軍劉劭共掌機事又別領東北選事尋解衛尉加侍中領石頭戍軍事明帝誅戮蕃戚江州刺史桂陽王休範以人凡獲全及

蒼梧王立更有窺同覬望密與左右闈人於後堂習馳馬招聚士
衆二萬人騎五百匹發盆口悉乘商旅船闕大雷戍王杜道欣鵠
頭戍王劉譽期告變朝廷惶駭太祖與護軍褚淵征北張永領軍
劉劭僕射劉秉游擊將軍戴明寶驍騎將軍阮佃夫右軍將軍王
道隆中書舍人孫千齡負外郎楊運長集中書省計議莫有言者
太祖曰昔上流謀逆皆因淹緩至於覆敗休範必遠懲前失輕兵
急下乘我無備今應變之術不宜念遠若偏師失律則大沮衆心
宜頓新亭白下堅守宮掖東府石頭以待賊千里孤軍後無委積
求戰不得自然瓦解我請頓新亭以當其鋒征北可以見甲守白
下中堂舊是置兵地領軍宜屯宣陽門爲諸軍節度諸貴安坐殿
中右軍諸人不須競出我自前驅破賊必矣因索筆下議竝注同
中書舍人孫千齡與休範有密契獨曰宜依舊遣軍據梁山魯顯

間右衛若不出白下則應進頓南州太祖正色曰賊今已近梁山
豈可得至新亭既是兵衝所以欲死報國耳常曰乃可屈曲相從
今不得也座起太祖顧謂劉劭曰領軍已同鄙議不可改易乃單
車白服出新亭加太祖使持節都督征討諸軍事平南將軍加鼓
吹一部治新亭城壘未畢賊前軍已至太祖方解衣高臥以安衆
心乃索白虎幡登西垣使寧朔將軍高道慶羽林監陳顯達負外
郎王敬則浮舸與賊水戰自新林至赤岸大破之燒其船艦死傷
甚衆賊步上新林太祖馳使報劉劭急開大小桁撥淮中船舫悉
渡北岸休範乘肩輿率衆至壘南上遣寧朔將軍黃回馬軍王周
盤龍將步騎出壘對陣休範分兵攻壘東短兵接戰自己至午衆
皆失色太祖曰賊雖多而亂尋破也楊運長領三齊射手七百人
引彊命中故賊不得逼城未時張敬兒斬休範首太祖遣隊王陳

靈寶送首還臺靈寶路中遇賊軍埋首道側臺軍不見休範首愈疑懼賊衆亦不知休範已死別率杜黑蠡急攻壘東司空王簿蕭惠領數百人突入東門叫噪至堂下城上守門兵披退太祖挺身上馬率數百人出戰賊皆推楯而前相去數丈分兵橫射太祖引滿將發左右將戴仲緒舉楯扞之箭應手飲羽傷百餘人賊死戰不能當乃却衆軍復得保城與黑蠡拒戰自晡達明旦矢石不息其夜大雨鼓叫不復相聞將士積日不得寢食軍中馬夜驚城內亂走太祖秉燭正坐厲聲呵止之如此者數四賊帥丁文豪設伏破臺軍於阜茨橋直至朱雀桁劉勔欲開桁王道隆不從勔及道隆竝戰沒初勔高尚其意託造園宅名爲東山頗忽世務太祖謂之曰將軍以顧命之重任兼內外王上春秋未幾諸王竝幼冲上流聲議遐邇所聞此是將軍艱難之日而將軍深尚從容廢省羽

翼一朝事至雖悔何追勔竟不納賊進至杜姥宅車騎典籤茅恬開東府納賊冠軍將軍沈懷明於石頭奔散張永潰於白下宮內傳新亭亦陷太祖執蒼梧王手泣曰天下敗矣太祖遣軍主陳顯達任農夫張敬兒周盤龍等從石頭濟淮聞道從承明門入衛宮闕休範旣死典籤許公與詐稱休範在新亭士庶惶惑詣壘投名者千數太祖隨得輒燒之乃列兵登城北謂曰劉休範父子先昨皆已卽戮屍在南岡下身是蕭平南諸君善見觀君等名皆已焚除勿有懼也臺分遣衆軍擊杜姥宅宣陽門諸賊皆破平之太祖振旅凱入百姓緣道聚觀曰全國家者此公也太祖與袁粲褚淵劉秉引咎解職不許遷散騎常侍中領軍都督南兗徐兗青冀五州軍事鎮軍將軍南兗州刺史持節如故進爵爲公增邑二千戶太祖欲分其功請益粲等戶更日入直決事號爲四貴秦時有太

后穰侯涇陽高陵君稱爲四貴至是乃復有焉四年加太祖尚書
左僕射本官如故休範平後蒼梧王漸行凶暴南徐州刺史建平
王景素少有令譽朝野歸心景素亦潛爲自全之計布款誠於太
祖太祖拒而不納七月羽林監袁祗奔景素便舉兵太祖出屯玄
武湖遣衆軍北討事平乃還太祖威名旣重蒼梧王深相猜忌幾
加大禍陳太妃罵之曰蕭諱有功於國今若害之後誰復爲汝著
力者乃止太祖密謀廢立五年七月戊子帝微行出北湖常單馬
先走羽儀禁衛隨後追之於堤塘相蹈藉左右張互兒馬墜湖帝
怒取馬置光明亭前自馳騎刺殺之因共屠割與左右作羌胡伎
爲樂又於蠻岡賭跳際夕乃還仁壽殿東阿氈屋中寢語左右楊
玉夫伺織女度報我時殺害無常人懷危懼玉夫與其黨陳奉伯
等二十五人同謀於氈屋中取千牛刀殺蒼梧王稱敕使廂下奏

伎因將首出與王敬則敬則送太祖太祖夜從承明門乘常所騎
赤馬入殿內驚怖旣知蒼梧王死咸稱萬歲及太祖踐阼號此馬
爲龍驤將軍世謂爲龍驤赤明日太祖戎服出殿庭槐樹下召四
貴集議太祖謂劉秉曰丹陽國家重戚今日之事屬有所歸秉讓
不當太祖次讓袁粲粲又不受太祖乃下議備法駕詣東城迎立
順帝於是長刀遮粲秉等各失色而去甲午太祖移鎮東府與袁
粲褚淵劉秉各甲仗五十人入殿丙申進位侍中司空錄尚書事
驃騎大將軍持節都督刺史如故封竟陵郡公邑五千戶給油幢
絡車班劍三十人太祖固辭上命卽驃騎大將軍開府儀同三司
庚戌進督南徐州刺史封楊玉夫等二十五人爵邑各有差十月
戊辰又進督豫司二州初荊州刺史沈攸之與太祖於景和世同
直殿省申以歡好以長女義興公主妻攸之第三子元和攸之爲

郢州值明帝晚運陰有異圖自郢州遷爲荊州聚斂兵力將吏逃亡輒討質隣伍養馬至二千餘匹皆分賦戍邏將士使耕田而食廩財悉充倉儲荊州作部歲送數千人仗攸之割留簿上供討四山蠻裝治戰艦數百千艘沈之靈溪裏錢帛器械巨積朝廷畏之高道慶家在華容假還過江陵道慶素便馬攸之與宴飲於聽事前合馬槊道慶槊中破攸之馬鞍攸之怒索刃槊道慶馳馬而出還都說攸之反狀請三千人襲之朝議慮其事難濟太祖又保持不許太祖旣廢立遣攸之子司徒左長史元琰賚蒼梧王諸虐害器物示之攸之未得卽起兵乃上表稱慶并與太祖書推功攸之有素書十數行常韜在襜褕角云是明帝與已約誓十二月遂舉兵其妾崔氏許氏諫攸之曰官年已老那不爲百口計攸之指襜褕角示之稱太后令召已下都京師恐懼乙卯太祖入居朝堂命

諸將西討平西將軍黃回爲都督前驅前湘州刺史王蘊太后兄子少有膽力以父指名宦不達欲以將途自奮每撫刀曰龍淵太阿汝知我者叔父景文誡之曰阿答汝滅我門戶蘊曰答與童烏貴賤覺異童烏景文子絢小字答蘊小字也蘊遭母喪罷任還至巴陵停舟一月日與攸之密相交構時攸之未便舉兵蘊乃下達郢州世祖爲郢州長史蘊期世祖出弔因作亂據郢城世祖知之不出蘊還至東府前又期太祖出太祖又不出弔再計不行外謀愈固司徒袁粲尚書令劉秉見太祖威權稍盛慮不自安與蘊及黃回等相結舉事殿內宿衛主帥無不協同攸之反問初至太祖往石頭與粲謀議粲稱疾不相見尅壬申夜起兵據石頭劉秉恇怯晡時從丹陽郡載婦女入石頭朝廷不知也其夜丹陽丞王遜告變秉從弟領軍韜及直閣將軍卜伯興等嚴兵爲內應太祖命

王敬則於宮內誅之遣諸將攻石頭王蘊將數百精手帶甲赴粲城門已閉官軍又至乃散眾軍攻石頭斬粲劉秉走雒檐湖蘊逃鬪場竝禽斬之粲位任雖重無經世之略疎放好酒步屨白揚郊野間道遇一士大夫便呼與酣飲明日此人謂被知顧到門求通粲曰昨飲酒無偶聊相要耳竟不與相見嘗作五言詩云訪迹雖中宇循寄乃滄州蓋其志也劉秉少以宗室清謹見知孝武世秉弟遐坐通嫡母殷氏養女殷言北齊本中血出眾疑行毒害孝武使秉從弟祇諷秉啟證其事秉曰行路之人尚不應尔今日迺可一門同盡無容奉救眾以此稱之故為明帝所任蒼梧廢秉出集議於路逢弟韞韞開車迎問秉曰今日之事固當歸兄邪秉曰吾等已讓領軍矣韞槌胸曰君肉中詎有血粲典籤莫嗣祖知粲謀太祖召問嗣祖表謀反何不啟聞嗣祖曰事主義無二心雖死不敢泄

也蘊嬖人張承伯藏匿蘊太祖竝赦而用之黃回頓新亭聞石頭鼓噪率兵來赴之朱雀桁有戍軍受節度不聽夜過會石頭已平因稱救援太祖知而不言撫之愈厚遣回西上流涕告别太祖屯閱武堂馳結軍旅閏月辛丑詔假黃鉞率大眾出屯新亭中興堂治嚴築壘教曰河南稱慈諒由掩齒廣漢流仁實存殯朽近袁製茲營崇溝浚塹古墟曩隧時有湮移深松茂草或致刊薙憑軒動懷巡惶增愴宜竝為收改葬并設薄祀

二年正月沈攸之攻郢城不剋眾潰自經死傳首京邑丙子太祖旋鎮東府二月癸未進太祖太尉增封三千戶都督南徐南兗徐兗青冀司豫荆雍湘郢梁益廣越十六州諸軍事太祖解驃騎辭都督不許乃表送黃鉞三月巳酉增班劔為四十人甲仗百人入殿丙子加羽葆鼓吹餘竝如故辛卯太祖誅鎮北將軍黃回大明

泰始以來相承奢侈百姓成俗太祖輔政罷御府省二尚方諸飾玩至是又上表禁民間華僞雜物不得以金銀爲箔馬乘具不得金銀度不得織成繡裙道路不得著錦履不得用紅色爲幡蓋衣服不得剪綵帛爲雜花不得以綾作雜服飾不得作鹿行錦及局脚檉柏牀牙箱籠雜物綵帛作屏障錦緣薦席不得私作器仗不得以七寶飾樂器又諸雜漆物不得以金銀爲花獸不得輒鑄金銅爲像皆須墨敕凡十七條其中宮及諸王服用雖依舊例亦請詳衷九月丙午進位假黃鉞都督中外諸軍事太傅領揚州牧劔履上殿入朝不趨贊拜不名置左右長史司馬從事中郎掾屬各四人使持節太尉驃騎大將軍錄尚書南徐州刺史如故固辭詔遣敦勸乃受黃鉞辭殊禮甲寅給三望車

三年正月乙巳太祖表蠲百姓逋負丙辰加前部羽葆鼓吹丁巳

命太傅府依舊辟召丁卯給太祖甲仗五百人出入殿省甲午重申前命劔履上殿入朝不趨贊拜不名三月甲辰詔進位相國總百揆封十郡爲齊公備九錫之禮加璽綬遠遊冠位在諸侯王上加相國綠綬授其驃騎大將軍揚州牧南徐州刺史如故太祖三讓公卿敦勸固請乃受甲寅策相國齊公曰天地變通莫大乎炎涼懸象著明莫崇乎日月嚴冬播氣貞松之操自高光景時昏若華之映彌顯是故英睿當亂而不移忠賢臨危而盡節自景和昏虐王綱弛紊太宗受命紹開中興運屬屯難四郊多壘蕭將軍震威華戎寔資義烈康國濟民於是乎在朕以不造風罹閔凶嗣君失德書契未紀威侮五行虔劉九縣神獸靈繹海水羣飛彘器已塵宗禋誰主綴旒之殆未足爲譬豈直小宛興刺黍離作歌而已哉天贊皇宋實啟明宰爰登寡昧纂承大業鴻緒再維閔基重造

高勲至德振古絕倫昔保衡翼殷博陸匡漢方斯茂如也今將授
公典禮其敬聽朕命乃者袁劉構禍寔繁有徒子房不臣稱兵協
亂跨蹈五湖憑陵吳越浮侵虧辰沈氛晦景桴鼓振於王畿鋒鏑
交乎天邑顧瞻宮掖將成茂草言念邦國剪爲仇讎當此之時人
無固志公投袂殉難超然奮發執金板而先馳登寅車而戒路軍
政端嚴卒乘輯睦麾鉞一臨凶黨冰泮此則霸業之基勤王之始
也安都背叛竊據徐方敢率犬羊陵虐淮許索兒愚悖同惡相濟
天祚無象背順歸逆北鄙黔黎奄墜塗炭均人廢職邊師告警公
受命宗祊精貫朝日擁節和門氣踰霄漢破釜之捷斬馘蔽野石
梁之戰禽其渠帥保境全民江陽卽序此又公之功也張淹迷昧
弗顧本朝受自南區志圖東夏潛軍間入竊覲不虞于時江服未
夷皇塗荐阻公忠誠慷慨在險彌高深識九變妙察五色以寡制

衆所向風偃朝廷無東顧之憂閩越有來蘇之慶此又公之功也
匈奴野心侵掠疆場前師失律王旅崩撓灑血成川伏尸千里醜
羯俯張勢振彭泗乘勝長驅窺覲京甸冠帶之軌將湮被髮之容
行及公奉辭伐罪戒旦晨征兵車始交氛禔時蕩弔死撫傷弘宣
皇澤俾我淮肥復沾盛化此又公之功也自茲厥後獫狁孔熾封
豕長蛇重窺上國而世故相仍師出日老戰士無臨陣之心戎卒
有懷歸之思是以下邳精甲望風振恐角城高壘指日淪陷公眷
言王事發憤忘食躬擐甲胄視險若夷短兵纔接巨猾鳥散分疆
畫界開創青兗此又公之功也秦始之末入參禁旅任兼軍國事
同顧命桂陽負衆輕問九鼎裂冠毀冕拔本塞源入兵萬乘之國
頓戟象魏之下烈火焚於王城飛矢集乎君屋機變儻忽終古莫
二羣后憂惶元戎無主公按劔凝神則奇謀貫世秉旄指麾則儒

夫成勇曾不崇朝新亭獻捷信宿之間宣揚底定雲霧廓清區宇
康乂此又公之功也皇室多難疊起戚蕃邗晉應韓翻爲讎敵建
平失圖與兵內侮公又指授六師義形乎色役未踰旬朱方寧晏
此又公之功也蒼梧肆虐諸夏宋本糜沸淫刑以逞誰則無罪火炎岷
岡玉石俱焚黔首相悲朝不謀夕高祖之業已淪大明之軌誰嗣
公遠稽殷漢之義近遵魏晉之典猥以眇身入奉宗祐七廟清謐
九區反政此又公之功也表粲無質劉秉攜貳韜述相扇成此亂
階醜圖潛構危機竊發據有石頭志犯應路公神謀內運霜鋒外
舉妖沴載澄國塗悅穆此又公之功也沈攸之苞禍歲月滋彰蜂
目豺聲阻兵安忍哀彼荆漢獨爲匪民乃眷西顧緬同異域而經
綸維始九伐未申長惡不悛遂逞凶逆驅合姦回勢過虓虎朝野
憂疑三軍沮氣公乘鉞出關凝威江甸正情與暉日同亮明略與

秋雲競爽至義所感人百其心鼗鼓一麾夏首寧謐雲梯未舉魯
山尅定積年逋誅一朝顯戮沮浦安流章臺順軌此又公之功也
公有濟天下之勲重之以明哲道庇生民志匡宇宙戮力肆心劬
勞王室自東徂西靡有寧晏險阻艱難備嘗之矣若乃締構宗稷
之勤造物資始之澤雲布霧散光被六幽弼予一人永清四海是
以秬草騰芳於郊園景星重暉於清漢遐方款關而慕義荒服重
譯而來庭往哉邈乎無得而名焉朕聞疇庸表德前王盛典崇樹
侯伯有國攸同所以文命成功玄珪顯錫姬旦秉哲曲阜啟蕃或
改玉以弘風或胙土以宣化禮絕常班寵冠羣辟爰逮桓文車服
異數惟公勲業超於先烈而褒賞闕於舊章古今之道何其爽歟
靜言欽歎良有缺然今進授相國以青州之齊郡徐州之梁郡南
徐州之蘭陵魯郡琅邪東海晉陵義興揚州之吳郡會稽凡十郡

封公爲齊公錫茲玄土首以白茅定爾邦家用建冢社斯實尚父
故藩世作盟主紀綱侯甸率由舊則往者周召建國師保兼任毛
畢執珪入作卿士內外之寵同規在昔今命使持節兼太尉侍中
中書監司空衛將軍雲都縣開國侯淵授公相國印綬齊公璽紱
持節兼司空守尚書令僧虔授齊公茅土金虎符第一至第五左
竹使符第一至第十左相國位總百辟秩踰三事職以禮移號隨
事革其以相國總百揆去錄尚書之稱送所假節侍中貂蟬中外
都督太傅太尉印綬竟陵公印策其驃騎大將軍揚州牧南徐州
刺史如故又加公九錫其敬聽後命以公執禮弘律儀形區宇遐
爾一體人無異業是用錫公大輅戎輅各一玄牡二駟公崇脩南
畝所寶惟穀王府充實百姓繁衍是用錫公衮冕之服赤舄副焉
公居身以謙導物以義鎔鈞庶品罔不和悅是用錫公軒縣之樂六佾

之舞公翼贊王猷聲教遠洽蠻夷竭歡回首內附是用錫公朱戶
以居公明鑒人倫澄辨涇渭官方與能英乂克舉是用錫公納陛
以登公保佑皇朝厲身化下杜漸防萌含生夤式是用錫公虎賁
之士三百人公禦寇以刑禦姦以德君親無將將而必誅是用錫
公鈇鉞各一公鳳舉四維龍騫八表威靈所振異域同文是用錫
公彤弓一彤矢百茲弓十茲矢千公明發載懷肅恭禋祀孝敬之
重義感靈祇是用錫公秬鬯一卣珪瓚副焉齊國置丞相以下一
遵舊式往欽哉其祇服朕命經緯乾坤宏亮洪業茂昭爾大德闡
揚我高祖之休命太祖三讓公卿敦勸固請乃受之丁巳下令赦
國內殊死以下今月十五日昧爽以前一皆原赦鰥寡孤獨不能
自存者賜穀五斛府州所領亦同蕩然宋帝詔齊公十郡之外隨
宜除用以齊國初建給錢五百萬布五千匹絹五千匹四月癸酉

詔進齊公爵爲王以豫州之南梁陳郡潁川陳留南兗州之盱眙
山陽秦郡廣陵海陵南沛十郡增封使持節司空衛將軍褚淵奉
策授璽級金虎符第一至第五左竹使符第一至第十左錫茲玄
土苴白茅改立王社相國揚州牧驃騎大將軍南徐州刺史如故
丙戌命齊王冕十有二旒建天子旌旗出警入蹕乘金根車駕六
馬備五時副車置旄頭雲罕樂舞八佾設鍾虞宮縣王世子爲太
子王女王孫爵命一如舊儀辛卯宋帝禪位下詔曰惟德動天玉
衡所以載序窮神知化億兆所以歸心用能經緯乾坤彌綸宇宙
闡揚鴻烈大庇生民晦往明來積代同軌前王踵武世必由之宋
德湮微昏毀相襲景和騁悖於前元徽肆虐於後三光再霾七廟
將墜璇極委馭含識知泯我文武之祚眇焉如綴靜惟此紊夕惕
疚心相國齊王天誕獻聖河嶽炳靈拯傾提危澄氛靜亂匡濟艱

難功均造物宏謀霜照祕算雲回旌旆所臨一麾必捷英風所拂
無思不偃表裏清夷遐邇寧謐旣而光啟憲章弘宣禮教姦宄之
類覩隆威而隔情慕善之儔仰徽猷而增厲道邁於重華勲超乎
文命蕩蕩乎無得而稱焉是以辨髮左衽之酋款關請吏木衣卉
服之長航海來庭豈惟肅慎獻楛越嘗薦鰲而已哉故四輿載宅
六府克和川陸效珍禎祥鱗集卿烟玉露旦夕揚藻嘉穉芝英晷
刻呈茂革運斯炳代終彌亮負宸握樞允歸明哲固以獄訟去宋
謳歌適齊昔金政旣淪水德締構天之曆數皎焉攸徵朕雖寡昧
闇于大道稽覽隆替爲日已久敢忘列代遺則人神至願乎便遜
位別宮敬禪于齊一依唐虞魏晉故事是日宋帝遜于東邸備羽
儀乘畫輪車出東掖門問今日何不奏鼓吹左右莫有答者壬辰
策命齊王曰伊太古初陳萬物紛綸開耀靈以鑑品物立元后以

馭蒸人若夫容成大庭之世宓義五龍之辰靡得而詳焉自軒黃
以降墳素所紀略可言者莫崇乎堯舜披金繩而握天鏡開玉匣
而總地維德之休明宸居靈極期運有終歸禪與能所以大唐遜
位謗然與歌有虞揖讓卿雲發采亮符命之攸臻坦至公以成務
懷生載懌靈祇效祉遺風餘烈光被無垠漢魏因循弗敢失墜爰
逮晉氏亦遵前儀惟我祖宗英獻勳格幽顯從天人而齊七政凝
至德而撫四維末葉不造仍世多故難滅星謀北齊本作
日食是謂出滄川竭惟王
聖哲淵明榮鏡宇宙體望日之威資就雲之澤臨下以簡御衆以寬
仁育羣生義征不譴國塗荐阻弘五慮而又寧皇緒將湮秉六術以
匡濟及至權臣內侮蕃屏陵上兵革雲翔萬邦震駭裁之以武風
綏之以文化遐邇清夷表裏肅穆戢琯戈而事黼黻委旌門而恭
儒館聲化遠洎荒服無塵殊類同規華戎一揆是以五光來儀於

軒庭九穗含芳於郊牧象緯昭澈布新之符已顯圖讖彪炳受終
之義既彰靈祇乃眷兆民引領朕聞至道深微惟人是弘天命無
常惟德是與所以仰鑒玄情俯察羣望敬禪神器授帝位於爾躬
四海困窮天祿永終於戲王其允執厥中儀刑前式以副率土之
欣望命司裘而謁蒼昊奏雲門而升圓丘時膺大禮永保洪業豈
不盛歟再命璽書曰皇帝敬問相國齊王大道之行與三代之英
朕雖闇昧而有志焉夫昏明相襲譬景之恒度春秋遞運時歲之
常序求諸天數猶且隆替矧伊在人能無終謝是故勛華弘風於
上葉漢魏垂式於後昆昔我高祖欽明文思振民育德皇靈眷命
奄有四海晚世多難姦宄寔繁鼓宵聞元戎旦警億兆夷人啟
處靡厝加以嗣君荒怠數虐萬方神鼎將遷寶策無主實賴英聖
匡濟艱危惟王體天則地含弘光大明並日月惠均雲雨國步斯

梗則稜威外發王猷不造則淵謨內昭重構閩吳再寧淮濟靜九
江之洪波卷海圻之氛沴放斥凶昧存我宗祀舊物惟新三光改
照逮至寵臣裂冠則裁以廟略荆漢反噬則震以雷霆麾旆所臨
風行草靡神筭所指龍舉雲屬諸夏廓清戎翟思躋興文偃武闡
揚洪烈明保冲昧翺翔禮樂之揚撫柔黔首咸濟仁壽之域自霜
露所墜星辰所經正朔不通人跡罕至者莫不踰山越海北面稱
蕃款關重譯脩其職貢是以禎祥發采左史載其奇玄象垂文保
章審其度鳳書表肆類之運龍圖顯班瑞之期重以珠衡日角神
姿特挺君人之義在事必彰書不云乎皇天無親惟德是輔民心
無常惟惠之懷神祇之眷如彼蒼生之願如此笙管變聲鍾石改
調朕所以擁璇持衡傾佇明哲昔金德既淪而傳祚於我有宋曆數
告終寔在茲日亦以水德而傳於齊式遵前典廣詢羣議王公卿

士咸曰惟宜今遣使持節兼太保侍中中書監司空衛將軍雩都
縣侯淵兼太尉守尚書令僧虔奉皇帝璽綬受終之禮一依唐虞
故事王其允副幽明時登元后寵綏八表以酬昊天之恩命太祖三
辭宋帝王公以下固請兼太史令將作匠陳文建奏符命曰六亢
位也後漢自建武至建安二十五年一百九十六年而禪魏魏自
黃初至咸熙二年四十六年而禪晉晉自太始至元熙二年一百
五十六年而禪宋宋自永初元年至昇明三年凡六十年咸以六
終六受六亢位也驗往揆今若斯昭著敢以職任備陳管穴伏願
順天時膺符瑞二朝百辟又固請尚書右僕射王儉奏被宋詔遜
位臣等參議宜尅日輿駕受禪撰立儀注太祖乃許焉
史臣曰案太一九宮占推漢高五年太一在四宮王人與客俱得
吉計先舉事者勝是歲高祖破楚晉元興二年太一在七宮太一

爲帝天目爲輔佐迫脇太一是年安帝爲桓玄所逼出宮大將在一宮參相在三宮格太一經言格者已立政事上下格之不利有爲安居之世不利舉動元興三年太一在七宮宋武破桓玄元嘉元年太一在六宮不利有爲徐傅廢營陽王七年太一在八宮關囚惡歲大小將皆不得立其年到彥之北伐初勝後敗客主俱不利十八年太一在二宮客主俱不利是歲氏楊難當寇梁益來年仇池破十九年大小將皆見關不立凶其年裴方明伐仇池尅百頃明年失之泰始元年太一在二宮爲大小將奄擊之其年景和廢二年太一在三宮不利先起主人勝其年晉安王子勛反元徽二年太一在六宮先起敗是歲桂陽王休範反竝伏誅四年太一在七宮先起者客西北走其年建平王景素敗昇明元年太一在七宮不利爲客安居之世舉事爲主人應發爲客袁粲沈攸之等

反伏誅是歲太一在杜門臨八宮宋帝禪位不利爲客安居之世舉事爲主人禪代之應也

南齊書卷一 本紀第一 終

策文難滅星謀疑

西川中興氏

南齊書卷二

本紀第二

西川中興氏

高帝下

建元元年夏四月甲午上即皇帝位於南郊設壇柴燎告天曰皇
 帝臣道成○取用玄牡昭告皇皇后帝宋帝陟鑿乾序欽若明命以命
 于諱夫肇自生民樹以司牧所以闡極則天開元創物肆茲大道
 天下惟公命不于常昔在虞夏受終上代粵自漢魏揖讓中葉咸
 炳諸典謨載在方冊水德既微仍世多故寔賴諱匡拯之功以弘
 濟于厥艱大造顛墜再構區宇宣禮明刑締仁緝義晷緯凝象川
 岳表靈誕惟天人罔弗和會乃仰協歸運景屬與能用集大命于
 茲辭德匪嗣至于累仍而羣公卿士庶尹御事爰及黎獻至于百
 戎僉曰皇天眷命不可以固違人神無託不可以曠王畏天之威

敢不祇從鴻曆敬簡元辰虔奉皇符升壇受禪告類上帝以永答
民衷式敷萬國惟明靈是饗禮畢大駕還宮臨太極前殿詔曰五
德更紹帝迹所以代昌三正迭隆王度所以改耀世有質文時或
因革其資元膺曆經道振民固以異術同揆殊流共貫者矣朕以
寡昧屬值艱季推肆勤之誠藉樂治之數賢能悉心士民致力用
獲拯溺龕暴一匡天下業未參古功殆侔昔宋氏以陸夷有徵曆
數攸及思弘樂推永鑒崇替爰集天祿于朕躬惟志菲薄辭弗獲
昭遂欽從天人式繇景命祇月正于文祖升禋鬯于上帝猥以寡
德光宅四海纂華代之蹤託王公之上若涉淵水罔知所濟寶祚
初啟洪慶惟新思俾利澤宣被億兆可大赦天下改昇明三年為
建元元年賜人爵二級文武進位二等鰥寡孤獨不能自存者穀
人五斛逋租宿債勿復收有犯鄉論清議贓汙淫盜一皆蕩滌洗

除先注與之更始長徒敕繫之囚特皆原遣亡官失爵禁錮奪勞
一依舊典封宋帝為汝陰王築宮丹陽縣故治行宋正朔車旗服
色一如故事上書不為表笈表不稱詔梁晉熙王燮為陰安公江夏
王躋為沙陽公隨王翽為舞陰公新興王嵩為定襄公建安王禧
為荔浦公郡公王為縣君縣公主為鄉君詔曰繼世象賢列代盛
典疇庸嗣美前載令圖宋氏通侯乃宜隨運省替但欽德懷義尚
表墳閭況功濟區夏道光民俗者哉降差之典宜遵往制南康縣
公華容縣公可為侯平鄉縣侯可為伯減戶有差以繼劉穆之王
弘何無忌後以司空褚淵為司徒吳郡太守柳世隆為南豫州刺
史詔曰宸運肇創寶命惟新宜弘慶宥廣敷蠲汰劫賊餘口沒在
臺府者悉原赦諸負豐流徙普聽還本土以齊國左衛將軍陳顯
達為中護軍中領軍王敬則為南兗州刺史左衛將軍李安民為

中領軍戊戌以荊州刺史疑爲尚書令驃騎大將軍開府儀同三司揚州刺史冠軍將軍映爲荊州刺史西中郎將晃爲南徐州刺史冠軍將軍垣崇祖爲豫州刺史驃騎司馬崔文仲爲徐州刺史斷四方上慶禮己亥詔曰自廬井毀制農桑易業鹽鐵妨民貨鬻傷治歷代成俗流蠹歲滋援拯遺弊革末反本使公不專利氓無失業二宮諸王悉不得營立屯邸封略山湖太官池藥宮停稅入優量省置庚子詔宋帝后蕃王諸陵宜有守衛有司奏帝陵各置長一人兵有差王陵五人妃嬪三人五月丙午進河南王吐谷渾拾寅號驃騎大將軍詔曰宸運革命引爵改封宋氏第秩雖宜省替其有預效屯夷宣力齊業者一任本封無所減降有司奏留襄陽郡公張敬兒等六十二人除廣興郡公沈曇亮等百二十二人改元嘉曆爲建元曆木德盛卯終未以正月卯祖十二月未臘丁

未詔曰設募取將懸賞購士蓋出權宜非曰恒制頃世艱險浸以成俗且長逋逸開罪山湖是爲黥刑不辱亡竄無咎自今以後可斷衆募壬子詔封佐命文武功臣新除司徒褚淵等三十一人進爵增戶各有差乙卯河南王吐谷渾拾寅奉表貢獻丙辰詔遣大使分行四方遣兼散騎常侍十二人巡行以交寧道遠不遣使已未汝陰王薨追謚爲宋順帝終禮依魏元晉恭帝故事辛酉陰安公劉變等伏誅追封謚上兄道度爲衡陽元王道生爲始安貞王丙寅追尊皇考曰宣皇帝皇妣爲孝皇后妃爲昭皇后六月辛未詔相國驃騎中軍三府職可依咨勞度二官若職限已盈所餘可賜滿壬申以游擊將軍周山圖爲兗州刺史乙亥詔曰宋末頻年戎寇兼災疾凋損或枯骸不收毀櫬莫掩宜速宣下埋藏營卹若標題猶存姓字可識可卽運載致還本鄉有司奏遣外監典事四

人周行離門外三十五里為限其餘班下州郡無棺器標題者屬所以臺錢供市庚辰七廟主備法駕即于太廟詔諸將及客戮力艱難盡勤直衛其從還宮者普賜位一階辛巳罷荊州刺史甲申立皇太子廣○宋本諱斷諸州郡禮慶見刑入重者降一等并申前赦恩百日立皇子凝為豫章王映為臨川王晃為長沙王晷為武陵王暲為安成王鏘為鄱陽王鑠為桂陽王鑑為廣陵王皇孫長懋為南郡王乙酉葬宋順帝于遂寧陵秋七月丁未詔曰交趾比景獨隔書朔斯乃前運方季負海不朝因迷遂往歸欵莫由曲赦交州部內李叔獻一人即撫南土文武詳才選用并遣大使宣揚朝恩以試守武平太守行交州府事李叔獻為交州刺史丙辰以虜偽茹蘆鎮主陰平公楊廣香為沙州刺史丁巳詔南蘭陵桑梓本鄉長蠲租布武進王業所基復十年九月辛丑詔二吳義興三郡遭

水減今年田租乙巳以新除尚書令驃騎將軍豫章凝為荆湘二州刺史平西將軍臨川王映為揚州刺史丙午司空褚淵領尚書令戊申車駕幸宣武堂宴會詔諸王公以下賦詩冬十月丙子立彭城劉胤為汝陰王奉宋帝後已卯車駕殷祠太廟辛巳詔曰朕嬰綴世務三十餘歲險阻艱難備嘗之矣末路屯夷戎車歲駕誠藉時來之運實資士民之力宋元徽二年以來諸從軍得官者未悉蒙祿可催速下訪隨正即給才堪餘任者訪洗量序若四州士庶本鄉淪陷簿籍不存尋校無所可聽州郡保押從實除奏荒遠闕中正者特許據軍簿奏除或戍扞邊役末由旋反聽於同軍各立五保所隸有司時為言列汝陰太妃王氏薨追贈為宋恭皇后十一月庚子以太子左衛率蕭晷先為司州刺史辛亥立皇太子妃裴氏甲申封功臣驃騎長史江謐等十一人爵戶各有差

二年春正月戊戌朔大赦天下以司空尚書令褚淵為司徒中軍將軍張敬兒為車騎將軍中領軍李安民為領軍將軍中護軍陳顯達為護軍將軍辛丑車駕親祠南郊癸卯詔索虜寇淮泗遣眾軍北伐內外纂嚴二月丁卯虜寇壽陽豫州刺史垣崇祖破走之置巴州壬申以三巴校尉明慧昭為巴州刺史戊子以寧蠻校尉蕭赤蒼為雍州刺史南蠻長史崔惠景為梁南秦二州刺史辛卯詔西境獻捷解嚴癸巳遣大使巡慰淮肥徐豫邊民尤貧遘難者刺史二千石量加賑卹甲午詔江西北民避難流徙者制遣還本土蠲今年租稅單貧及孤老不能自存者即聽番籍郡縣押領三月丁酉以侍中西昌侯齊本諱為郢州刺史戊戌以護軍將軍陳顯達為南兗州刺史吳郡太守張岱為中護軍己亥車駕幸樂遊宴會王公以下賦詩辛丑以征虜將軍崔思祖為青冀二州刺史夏四

月丙寅進高麗王樂浪公高璉號驃騎大將軍五月立六門都牆六月癸未詔昔歲水旱曲赦丹陽二吳義興四郡遭水尤劇之縣元年以前三調未充虛列已畢官長局吏應共償備外詳所除省秋七月甲寅以輔國將軍盧紹之為青冀二州刺史戊午皇太子妃裴氏薨閏月辛巳遣領軍將軍李安民行淮泗庚寅索虜攻朐山青冀二州刺史盧紹之等破走之冬十一月戊子以氏楊後起為秦州刺史十二月戊戌以司空褚淵為司徒乙巳車駕幸中堂聽訟壬子以驃騎大將軍豫章王疑為司空揚州刺史前將軍臨川王映為荊州刺史

三年春正月壬戌朔詔王公卿士薦讜言丙子以平北將軍陳顯達為益州刺史貞陽公柳世隆為南兗州刺史皇子鋒為江夏王領軍將軍李安民等破虜於淮陽夏四月以寧朔將軍沈景德為

廣州刺史六月壬子大赦逋租宿債除減有差秋七月以冠軍將軍垣榮祖爲徐州刺史冬十月戊子以河南王世子吐谷渾度易侯爲西秦河二州刺史河南王

四年春正月壬戌詔曰夫膠庠之典彛倫攸先所以招振才端啟發性緒弘字黎氓納之軌義是故五禮之迹可傳六樂之容不泯朕自膺曆受圖志闡經訓且有司羣僚奏議咸集蓋以戎車時警文教未宣思樂泮宮永言多慨今關雎無虞時和歲稔遠邇同風華夷慕義便可式遵前准脩建敦學精選儒官廣延國胄以江州刺史汪延之爲右光祿大夫癸亥詔曰比歲申威西北義勇爭先殞氣寇場命盡王事戰亡蠲復雖有恒典王者遵用每傷簡薄建元以來戰亡賞蠲租布二十年雜役十年其不得收屍王軍保押亦同此例以後將軍長沙王晃爲護軍將軍中軍將軍南郡王長

懋爲南徐州刺史冠軍將軍安成王暕爲江州刺史二月乙未以冠軍將軍桓康爲青冀二州刺史上不豫庚辰詔原京師囚繫有差元年以前逋責皆原除三月庚申召司徒褚淵左僕射王儉詔曰吾本布衣素族念不到此因藉時來遂隆大業風道沾被升平可期邁疾彌留至于大漸公等奉太子如事吾柔遠能邇緝和內外當令太子敦穆親戚委任賢才崇尚節儉弘宣簡惠則天下之理盡矣死生有命夫復何言壬戌上崩于臨光殿年五十六四月庚寅上謚曰太祖高皇帝奉梓宮于東府前渚升龍舟丙午窆武進泰安陵上少沈深有大量寬嚴清儉喜怒無色博涉經史善屬文工草隸書奕碁第一品雖經綸夷險不廢素業從諫察謀以威重得衆卽位後身不御精細之物敕中書舍人桓景真曰王衣中似有玉介導此制始自大明末後泰始尤增其麗留比置王衣政是

興長疾源可卽時打碎凡復有可異物皆宜隨例也後宮器物欄檻以銅爲飾者皆改用鐵內殿施黃紗帳宮人著紫皮履華蓋除金花瓜用鐵迴釘每曰使我治天下十年當使黃金與土同價欲以身率天下移變風俗上姓名骨體及期運曆數竝遠應圖讖數十百條曆代所未有臣下撰錄上抑而不宣盛矣

史臣曰孫卿有言聖人之有天下受之也非取之也漢高神武駿聖觀秦氏東遊蓋是雅多大言非始自知天命光武聞少公之論讖亦特一時之笑語魏武初起義兵所期征西之墓晉宣不內迫曹爽豈有定霸浮橋宋氏屈起匹夫兵由義立咸皆一世推雄卒開鼎祚宋氏正位八君十年五紀四絕長嫡三稱中興內難邊虞兵革世動太祖基命之初武功潛用泰始開運大拯時艱龍德在田見猜雲雨之迹及蒼梧暴虐豐結朝野百姓懍懍命懸朝夕權

道旣行兼濟天下元功振主利器難以假人羣才戮力實懷尺寸之望豈其天厭水行固已人希木德歸功與能事極乎此雖至公於四海而運實時來無心於黃屋而道隨物變應而不爲此皇齊所以集大命也

贊曰於皇太祖有命自天同度宇宙合量山淵宋德不紹神器虛傳寧亂以武黜暴資賢庸發西疆功興北翰偏師獨克孤旅霆斷援旆東夏職司靜亂指斧徐方時惟伐叛抗威京輦坐清江漢文藝在躬芳塵淵塞用下以才鎮民以德端已雄睟君臨尊默苞括四海大造家國

南齊書卷三

本紀第三

武帝

世祖武皇帝諱暉字宣遠太祖長子也小諱龍兒生於建康青溪宅其夜陳孝后劉昭后同夢龍據屋上故字上焉初爲尋陽國侍郎辟州西曹書佐出爲贛令江州刺史晉安王子勛反上不從命南康相沈肅之繫上於郡獄族人蕭欣祖門客桓康等破郡迎出上肅之率將吏數百人追擊上與左右拒戰生獲肅之斬首百餘級遂率部曲百餘人舉義兵始興相殷孚將萬兵赴子勛於尋陽或勸上擊之上以衆寡不敵避屯揭陽山中聚衆至三千人子勛遣其將戴凱之爲南康相及軍王張宗之千餘人助之上引兵向郡擊凱之別軍王程超數百人於南康口又進擊宗之破斬之遂

圍郡城凱之以數千人固守上親率將士盡日攻之城陷凱之奔走殺偽贛令陶冲之上卽據郡城遣軍主張應期鄧惠真三千人襲豫章子勛遣軍主談秀之等七千人與應期相拒於西昌築營壘交戰不能決聞上將自下秀之等退散事平徵爲尚書庫部郎征北中兵參軍西陽縣子帶南東莞太守越騎校尉正員郎劉韞撫軍長史襄陽太守別封贛縣子邑三百戶固辭不受轉寧朔將軍廣興相桂陽王休範反上遣軍襲尋陽至北嶠事平除晉熙王安西諮議不拜復還都轉司徒右長史黃門郎沈攸之在荆楚宋朝密爲之備元徽四年以上爲晉熙王鎮西長史江夏內史行郢州事順帝立徵晉熙王燮爲撫軍揚州刺史以上爲左衛將軍輔燮俱下沈攸之事起未得朝廷處分上以中流可以待敵卽據盆口城爲戰守之備太祖聞之喜曰此真我子也上表求西討不許乃

遣偏軍援郢平西將軍黃回等皆受上節度加上冠軍將軍持節昇明二年事平轉散騎常侍都督江州豫州之新蔡晉熙二郡軍事征虜將軍江州刺史持節如故封聞喜縣侯邑二千戶其年徵侍中領軍將軍給鼓吹一部府置佐史領石頭戍軍事尋又加持節督京畿諸軍事三年轉散騎常侍尚書僕射中軍大將軍開府儀同三司進爵爲公持節都督領軍如故給班劍二十人齊國建爲齊公世子改加侍中南豫州刺史給油絡車羽葆鼓吹增班劍爲四十人以石頭爲世子宮官置二率以下坊省服章一如東宮進爵王太子太祖卽位爲皇太子建元四年三月壬戌太祖崩上卽位大赦征鎮州郡令長軍屯營部各行喪三日不得擅離任都邑城守防備幢隊一不得遷乙丑稱先帝遺詔以司徒褚淵錄尚書事尚書左僕射王儉爲尚書令車騎將軍張敬兒爲開府儀同

三司詔曰喪禮雖有定制先旨每存簡約內官可三日一還臨外官間一日還臨後有大喪皆如之丁卯以右衛將軍呂安國爲司州刺史庚午以司空豫章王嶷爲太尉癸酉詔曰城直之制歷代宜同頃歲逋施遂以萬計雖在憲宜懲而原心可亮積年逋城可悉原蕩自茲以後申明舊科有違糾裁庚辰詔曰比歲未稔貧窮不少京師二岸多有其弊遣中書舍人優量賑卹夏四月丙午以輔國將軍張倪爲兗州刺史辛卯追尊穆妃爲皇后五月乙丑以丹陽尹聞喜公子良爲南徐州刺史甲戌以新除左衛將軍垣崇祖爲豫州刺史癸未詔曰頃水雨頻降潮流荐滿二岸居民多所淹漬遣中書舍人與兩縣官長優量賑卹六月甲申立皇太子長懋詔申壬戌赦恩百日乙酉以鄱陽王鏘爲雍州刺史臨汝公子卿爲郢州刺史甲午以寧朔將軍臧靈智爲越州刺史丙申立皇

太子妃王氏進封聞喜公子良爲竟陵王臨汝公子卿爲廬陵王應城公子敬爲安陸王江陵公子懋爲晉安王枝江公子隆爲隨郡王皇子子真爲建安王皇孫昭業爲南郡王戊戌詔曰水潦爲患星緯乖序京都囚繫可尅日訊決諸遠獄委刺史以時察判建康秣陵二縣貧民加賑賜必令周悉吳興義興遭水縣蠲除租調癸卯以司徒褚淵爲司空驃騎將軍秋七月庚申以衛尉蕭順之爲宋豫州刺史壬戌以冠軍將軍垣榮祖爲青冀二州刺史八月癸卯司徒褚淵薨九月丁巳以國哀故罷國子學己巳以前軍將軍姜伯起爲秦州刺史辛未以征南將軍王僧虔爲左光祿大夫開府儀同三司尚書右僕射王奐爲湘州刺史冬十二月己丑詔曰緣淮戍將久處邊勞三元行始宜沾恩慶可遣中書舍人宣旨臨會後每歲皆如之庚子以太子左衛率戴僧靜爲徐州刺史

永明元年春正月辛亥車駕祠南郊大赦改元壬子詔內外羣僚各舉朕違肆心規諫又詔王公卿士各舉所知隨方登叙詔曰經邦之寄寔資莅民守宰祿俸益有恒準徃以邊虞告警故浚時損益今區寓寧晏庶績咸熙念勤簡能宜加優獎郡縣丞尉可還田秩太尉豫章王疑領太子太傅護軍將軍長沙王晃爲南徐州刺史鎮北將軍竟陵王子良爲南兗州刺史庚申以侍中蕭景先爲中領軍壬戌立皇弟銳爲南平王鏗爲宜都王皇子子明爲武昌王子罕爲南海王甲子爲築青溪舊宮詔梁仗瞻履二月辛巳以征虜將軍楊昺爲沙州刺史辛丑以隴西公宕昌王梁彌機爲河源二州刺史東羌王像舒彭爲西涼州刺史三月癸丑詔曰宋德將季風軌陵遲列宰庶邦彌失其序遷謝道速公私凋弊泰運初基草昧惟始思述先範永隆治根莅民之職一以小滿爲限其有

聲績尅舉厚加甄異理務無庸隨時代黜丙辰詔曰朕自丁荼毒奄便周忌瞻言負荷若墜淵壑而遠圖尚蔽政刑未理星緯失序陰陽愆度思播先澤兼酬天青可申辛亥赦恩五十日以期訖爲始京師囚繫悉皆原有三署軍徒優量降遣都邑鰥寡尤貧詳加賑卹戊寅詔四方見囚罪無輕重及劫賊餘口長徒赦繫悉原赦逋負督贓建元四年三月以前皆特除夏四月壬午詔曰魏矜表紹恩洽丘墓晉亮兩王榮覃餘裔二代弘義前載美談表粲劉秉與先朝同獎宋室沈攸之於景和之世特有迴心雖末節不終而始誠可錄歲月彌徃宜特優降粲秉前年改葬塋兆未脩材槨可爲經理令粗足周禮攸之及其諸子喪柩在西者可符荊州送反舊墓在所爲營葬事五月丁酉車騎將軍張敬兒伏誅六月丙寅詔凡坐事應覆治者在建元四年三月已前皆原宥秋七月戊戌

新除左光祿大夫王僧虔加特進九月己卯以荊州刺史臨川王
暎爲驃騎將軍冠軍將軍廬陵王子卿爲荊州刺史吳郡太守安
陸侯緬爲郢州刺史

二年春正月乙亥以司州刺史呂安國爲南兗州刺史征北將軍
竟陵王子良爲護軍將軍兼司徒征北長史劉俊爲司州刺史丙
子以右光祿大夫王延之爲特進三月乙亥以吳興太守張岱爲
南兗州刺史前將軍王奐爲江州刺史平北將軍呂安國爲湘州
刺史戊寅以少府趙景翼爲廣州刺史夏四月甲辰詔揚南徐南
兗徐兗五州統內諸獄并豫江三州府州見囚江州尋陽新蔡兩
郡繫獄竝部送還臺須侯克日斷枉直緣江遠郡及諸州委刺史
詳察訊已巳以寧朔將軍程法勤爲寧州刺史六月癸卯車駕幸
中堂聽訟乙巳以安陸王子敬爲南兗州刺史戊申以黃門侍郎

崔平仲爲青冀二州刺史秋七月癸未詔曰夫樂所自生先哲垂
誥禮不忘本積代同風是以漢光遲回於南陽魏文殷勤於譙國
青溪宮體天含輝則地栖寶光定靈源允集符命在昔期運初開
經綸方遠繕築之勞我則未暇時流事往永唯哽咽朕以寡薄嗣
奉鴻基思存締構式表王迹考星創制揆日興功子來告畢規摹
昭備宜申爨落之禮以暢感尉之懷可克日小會甲申立皇子子
倫爲巴陵王八月丙午車駕幸舊宮小會設金石樂在位者賦詩
詔申京師獄及三署見徒量所降者領宮職司詳賜幣帛戊申車
駕幸玄武湖講武甲子詔曰窆枯掩骼義重前誥卹老哀癯寔惟
令典朕求思民瘼弗忘鑿寐聲慙未敷物多乖所京師二縣或有
久墳毀發可隨宜掩埋遺骸未襯並加斂瘞疾病窮困不能自存
者詳爲條格並加沾賚冬十月丁巳以桂陽王鑠爲南徐州刺史

十一月丁亥以始興王鏗為益州刺史

三年春正月丙辰以大司農劉楷為交州刺史安西諮議參軍崔慶緒為南梁秦二州刺史甲申以晉安王子懋為南豫州刺史辛卯車駕祠南郊大赦都邑三百里內罪應入重者降一等餘依赦制劾繫之身降遣有差賑卹二縣貧民又詔曰春秋國語云生民之有學教猶樹木之有枝葉果行育德咸必由茲在昔開運光宅華夏方弘典謨克隆教思命彼有司崇建庠塾甫就經始仍離屯故仰瞻徽猷歲月彌遠今遐邇一體車軌同文宜高選學官廣延胄子又詔守宰親民之要刺史案部所先宜嚴課農桑相土揆時必窮地利若耕蠶殊眾足厲浮墮者所在卽便列奏其違方驕矜佚事妨農亦以名聞將明賞罰以勸勤怠校覈殿最歲竟考課以申黜陟二月辛丑車駕祠北郊夏四月戊戌以新除右衛將軍豫

章王世子子響為豫州刺史輔國將軍桓敬為兗州刺史五月乙未詔曰氓俗凋弊于茲永久雖年穀時登而歉乏比室凡單丁之身及瘠獨而秩養養孤者並蠲今年田租是月省總明觀六月庚戌進河南王度易侯為車騎將軍秋七月辛丑詔丹陽所領及餘二百里內見囚同集京師自此以外委州郡決斷甲戌左光祿大夫開府儀同三司王僧虔薨丁亥以驃騎中兵參軍董仲舒為寧州刺史八月乙未車駕幸中堂聽訟丁巳以行宕昌王梁彌頡為河涼二州刺史戊午以尚書令王儉領太子少傅太子詹事蕭順之。宋本諱為領軍將軍冬十月壬戌詔曰天子長懋。宋本諱講畢當釋奠王公以下可悉往觀禮十一月乙丑以冠軍將軍王文仲為青冀二州刺史十二月丁酉詔曰九穀之重八材為末是故潔粢豐盛祝史無愧于辭不籍千畝周宣所以貽諫昔期運初啟庶政草昧三推之典

我則未暇朕嗣奉鴻基思隆先軌載來躬親率由舊式可以開春
發歲敬簡元辰鳴青鸞於東郊冕朱紘而莅事仰薦宗禋俯勗黔
阜將使困庾內充遺秉外物既富而教茲焉攸在是夏琅邪郡旱
百姓芟除枯苗至秋擢穎大熟

四年春正月甲子以南琅邪彭城二郡太守隨郡王子隆爲江州
刺史征虜長史張瓌爲雍州刺史征虜將軍薛淵爲徐州刺史護
軍將軍兼司徒竟陵王子良進號車騎將軍富陽人唐寓之反聚
衆桐廬破富陽錢塘等縣害東陽太守蕭崇之遣宿衛兵出討伏
誅丁酉冠軍將軍馬軍主陳天福坐討唐寓之燒掠百姓棄市辛
卯車駕幸中堂策秀才閏月癸巳立皇子子貞爲邵陵王皇孫昭
文爲臨汝公丁未以武都王楊集始爲北秦州刺史辛亥車駕藉
田詔曰夫耕藉所以表敬親載所以率民朕景行前規躬執耒耜

千畝成事六仞可期教義克宣誠感兼暢重以天符靈貺歲月鱗
萃寶鼎開玉匣之祥嘉禾發同穗之穎甘露凝暉於坳牧神爵壽
翥於蘭圃斯乃宗稷之慶豈寡薄所臻思俾休和單茲黔阜見刑
罪殊死以下悉原宥諸逋負在三年以前尤窮弊者一皆蠲除孝
悌力田詳授爵位孤老貧窮賜穀十石凡欲附農而糧種闕乏者
並加給貸務在優厚癸丑以始興內史劉敕爲廣州刺史甲寅以
籍田禮畢車駕幸閱武堂勞酒小會詔賜王公以下在位者帛有
差戊午車駕幸宣武堂講武詔曰今親閱六師少長有禮領馭羣
帥可量班賜二月己未立皇弟鉢爲晉熙王鉉爲河東王庚寅以
光祿大夫王玄載爲兗州刺史三月辛亥國子講孝經車駕幸學
賜國子祭酒博士助教絹各有差夏四月丁亥以尚書左僕射柳
世隆爲湘州刺史臨沂縣麥不登刈爲馬芻至夏更苗秀五月癸

已詔揚南徐二州今年戶租三分二取見布一分取錢來歲以後
遠近諸州輸錢處並減布直匹淮四百依舊折半以爲永制丙午
以吳興太守西昌侯本傳爲中領軍秋八月辛酉以鎮南長史
蕭惠休爲廣州刺史九月甲寅以征虜將軍王廣之爲徐州刺史
冬十二月乙亥以東中郎司馬崔惠景爲司州刺史

五年春正月戊子以太尉豫章王嶷爲大司馬車騎將軍竟陵王
子良爲司徒驃騎將軍臨川王映衛將軍王儉中軍將軍王敬則
並本號開府儀同三司都官尚書沈文季爲郢州刺史左將軍安
陸王子敬爲荊州刺史征虜將軍晉安王子懋爲南兗州刺史輔
國將軍建安王子真爲南豫州刺史辛卯詔曰朕昧爽丕顯思康
民瘼雖年穀亟登而饑饉代有今履端肇運陽和告始宜協時休
覃茲黎庶諸孤老貧病並賜糧餼遣使親賦每存均普雍司二州

蠻虜屢動丁酉遣丹陽尹蕭景先出平陽護軍將軍陳顯達出宛
葉二月戊子車駕幸芳林園禊宴丁未以護軍將軍陳顯達爲雍
州刺史夏四月車駕殷祠太廟詔繫囚見徒四歲刑以下悉原遣
五年減爲三歲京邑罪身應入重降一等六月辛酉詔曰比霖雨
過度水潦洊溢京師居民多離其弊遣中書舍人二縣官長隨宜
賑賜秋七月戊申詔丹陽屬縣建元四年以來至永明三年所逋
田租殊爲不少京甸之內宜加優貸其非中貲者可悉原停八月
乙亥詔今夏雨水吳興義興二郡田農多傷詳蠲租調九月己丑
詔曰九日出商飆館登高宴羣臣辛卯車駕幸商飆館館上所立
在孫陵岡世呼爲九日臺者也丙午詔曰善爲國者使民無傷而
農益勸是以十一而稅周道克隆建常平漢載惟穆岱畎絲枲
浮汶來貢杞梓皮革必緣楚往自水德將謝喪亂彌多師旅歲興

饑饉代有貧室盡於課調泉貝傾於絕域軍國器用動資四表不
因厥產咸用九賦雖有交貿之名而無潤私之實民咨塗炭實此
之由昔在開運星紀未周餘弊尚重農桑不殷於曩日粟帛輕賤
於當年工商罕兼金之儲匹夫多饑寒之患良由圓法久廢上幣
稍寡所謂民失其資能無匱乎凡下貧之家可蠲三調二年京師
及四方出錢億萬糴米穀絲綿之屬其和價以優黔首遠邦嘗市
雜物非土俗所產者皆悉停之必是歲賦攸宜都邑所乏可見直
和市勿使逋刻冬十月甲申以中領軍西昌侯○宋口本諱為豫州刺
史侍中安陸侯○中領軍初起新林苑

六年春正月壬午以祠部尚書安成王暉為南徐州刺史詔二百
里內獄同集京師克日聽覽自此以外委州郡訊察三署徒隸詳
所原釋三月己亥以豫章王世子子響為巴東王癸卯以光祿大

夫周盤龍為行兗州刺史五月甲午以宕昌王梁彌承為河涼三
州刺史六月甲寅以散騎常侍沈景德為徐州刺史丙子以始興
太守房法乘為交州刺史秋七月乙巳都官尚書呂安國為領軍
將軍八月乙卯詔吳興義興水潦被水之鄉賜瘡疾篤癘口二斛
老疾一斛小口五斗九月壬寅車駕幸琅邪城講武習水步軍冬
十月庚申立冬初臨太極殿讀時令辛酉以祠部尚書武陵王暉
為江州刺史閏月乙卯詔曰北兗北徐豫司青冀八州邊接疆場
民多懸罄原永明以前所逋租調辛卯以尚書僕射王奐為領軍
將軍十一月乙卯以羽林監費延宗為越州刺史庚申以後將軍
晉安王子懋為湘州刺史西陽王子明為南兗州刺史
七年春正月丙午以中軍將軍王敬則為豫州刺史中軍將軍陰
智伯為梁南秦二州刺史戊申詔曰雍州頻歲戎役兼水旱為弊

原四年以前逋租辛亥車駕祠南郊大赦京邑貧民普加賑賜又
詔曰春頒秋斂萬邦所以惟懷柔遠能邇兆民所以允殖鄭渾宰
邑因姓立名王濬剖符戶口殷盛今產子不育雖炳常禁比聞所
在猶或有之誠復禮以貧殺抑亦情由俗淡宜節以嚴威敦以惠
澤主者尋舊制詳量附定蠲卹之宜務存優厚壬戌驃騎將軍開
府儀同三司臨川王映薨戊辰詔曰諸大夫年秩隆重祿力殊薄
豈所謂下車惟舊趨橋敬老可增俸詳給見役二月丙子以左衛
將軍巴東王子響爲中護軍己丑詔曰宣尼誕敷文德峻極自天
發輝七代陶鈞萬品英風獨舉素王誰匹功隱於當年道深於日
月感麟厭世緬邈千祀川竭谷虛丘夷淵塞非但洙泗湮淪至乃
饗嘗之主前王敬仰崇脩寢廟歲月亟流鞠爲茂草今學敦興立
實稟洪規撫事懷人彌增欽屬可改築宗祊務在爽塏量給祭秩

禮同諸侯奉聖之爵以時紹繼壬申以丹陽尹王晏爲江州刺史
癸卯以巴陵王子倫爲豫州刺史三月丁未以太子右衛率王玄
龜爲兗州刺史庚戌以中護軍巴東王子響爲江州刺史中書令
郡王子隆爲中護軍甲寅立皇子子岳爲臨賀王子峻爲廣漢
王子琳爲宣城王子珉爲義安王夏四月戊寅詔曰婚禮下達人
倫攸始周官設媒氏之職國風興及時之詠四爵內陳義不期侈三
隸外列事豈存奢晚俗浮麗歷茲永久每思懲革而民未知禁乃
聞同率之費華泰尤甚膳羞方丈有過王侯富者扇其驕風貧者
恥躬不逮或以供帳未具動致推遷年不再來盛時忽往宜爲節
文頒之士庶竝可擬則公朝方標供設合登之禮無虧寧儉之義
斯在如故有違繩之以法五月乙巳尚書令衛將軍開府儀同三
司王儉薨甲子以新除尚書左僕射柳世隆爲尚書令六月丁亥

車駕幸琅邪秋八月庚子以左衛將軍建安王子真爲中護軍冬十月己丑詔曰王季澆浮舊章陵替吉凶奢靡動違矩則或裂錦繡以競車服之飾塗金鏤石以窮塋域之麗至班白不婚露棺累葉荷相媵銜罔顧大典可明爲條制嚴勒所在悉使畫一如復違犯依事糾奏十二月己亥以中護軍建安王子真爲郢州刺史江州刺史巴東王子響爲荊州刺史前安西司馬垣榮祖爲兗州刺史

八年春正月庚子征西大將軍王敬則進號驃騎大將軍左將軍沈文季爲領軍將軍丹陽尹鄱陽王鏘爲江州刺史詔放遣隔城虜俘聽還本土壬辰零陵王司馬藥師薨夏四月戊辰詔公卿已下各舉所知隨才授職進得其人受登賢之賞薦非其才獲濫舉之罰秋七月辛丑以會稽太守安陸侯緬爲雍州刺史癸卯詔曰陰

陽姪和緯象愆度儲胤嬰患淹歷旬晷思仰祇天戒俯紆民瘼可大赦天下癸亥詔司雍二州比歲不稔雍州八年以前司州七年以前逋租悉原汝南一郡復限更申五年八月丙寅詔京邑霖雨旣過居民汎濫遣中書舍人二縣官長賑卹乙酉以行河南王世子休留代爲秦河二州刺史壬辰以左衛將軍隨郡王子隆爲荊州刺史巴東王子響有罪遣丹陽尹蕭順之率軍討之子響伏誅冬十月丁丑詔吳興水淹過度開所在倉賑賜癸巳原建元以前逋租十一月乙卯以建武將軍伏登之爲交州刺史十二月乙丑以振威將軍陳僧授爲越州刺史戊寅詔尚書丞郎職事繁劇卹俸未優可量增賜祿巳卯皇子子建爲湘東王癸巳以監青冀二州軍行刺史事張沖爲青冀二州刺史

九年春正月甲午以侍中江夏王鋒爲南徐州刺史冠軍將軍劉

俊爲益州刺史辛丑車駕祠南郊詔京師見囚繫詳量原遣三月
乙卯以南中郎司馬劉楷爲司州刺史辛丑以太子左衛率劉續
爲廣州刺史夏四月乙亥有司奏舊格一年兩過行陵三月十五
日曹郎以下小行九月十五日司空以下大行今長停小行唯二
州一大行詔曰可六月甲戌以尚書左僕射王奐爲雍州刺史秋
九月戊辰車駕幸琅邪城講武觀者傾都普頒酒肉

十年春正月戊午詔諸責負衆逋七年以前悉原除高貲不在例
孤老六疾人穀五斛内外有務衆官增祿俸以左民尚書南平王
銳爲湘州刺史司徒竟陵王子良領尚書令右衛將軍王玄邈爲
北徐州刺史中軍將軍廬陵王子卿進號車騎將軍北中郎將南
海王子罕爲兗州刺史輔國將軍臨汝公昭文爲南豫州刺史冠
軍將軍王文和爲北兗州刺史二月壬辰鎮軍將軍陳顯達領中

領軍夏四月辛丑大司馬豫章王疑薨五月己巳司徒竟陵王子
良爲揚州刺史秋八月丙辰以新城太守郭安明爲寧州刺史冬
十月乙丑車駕幸玄武湖講武甲午車駕殿祠太廟十一月戊午
詔曰頃者霖雨樵糧稍貴京邑居民多離其弊遣中書舍人二縣
官長賑賜

十一年春正月癸丑詔京師見繫囚詳所原遣以驃騎大將軍王
敬則爲司空江州刺史鄱陽王鏘爲領軍將軍鎮軍大將軍陳顯
達爲江州刺史右衛將軍崔慧景爲豫州刺史丙子皇太子長懋
薨二月壬午以車騎將軍廬陵王子卿爲驃騎將軍南豫州刺史
撫軍將軍安陸王子敬進號車騎將軍己丑輔國將軍曹虎爲梁
南秦二州刺史癸卯以新除中書監晉安王子懋爲雍州刺史丙
午以冠軍將軍王文和爲益州刺史三月乙亥雍州刺史王奐伏

誅夏四月壬午詔東宮文武臣僚可悉度爲太孫官屬甲午立皇
太孫昭業太孫妃何氏詔賜天下爲父後者爵一級孝子順孫義
夫節婦粟帛各有差矣卯以驍騎將軍劉靈哲爲兗州刺史五月
戊辰詔曰水旱成災穀稼傷弊凡三調衆逋可同申至秋登京師
二縣朱方姑熟可權斷酒庚午以輔國將軍蕭惠休爲徐州刺史
丙子以左民尚書宜都王鏗爲南豫州刺史六月壬午詔霖雨旣
過遣中書舍人二縣官長賑賜京邑居民秋七月丁巳詔曰頃風
水爲災二岸居民多離其患加以貧病六疾孤老稚弱彌足矜念
遣中書舍人履行沾卹又詔曰水旱爲災實傷農稼江淮之間倉
廩旣虛遂草竊充斥互相侵奪依阻山湖成此逋逃曲赦南兗
豫司徐五州南豫州之歷陽譙臨江廬江四郡三調衆逋宿債並
同原除其緣淮及青冀新附僑民復除已訖更申五年是月上不

豫徙御延昌殿乘輿始登階而殿屋鳴咤上惡之虜侵邊戊辰遣
江州刺史陳顯達鎮雍州樊城上慮朝野其惶乃力疾召樂府奏
正聲伎戊寅大漸詔曰始終大期賢聖不免吾行年六十亦復何
恨但皇業艱難萬機事重不能無遺慮耳太孫進德日茂社稷有
寄子良善相毗輔思弘治道內外衆事無大小悉與參懷共下
意尚書中是職務根本悉委王晏徐孝嗣軍旅捍邊之略委王敬
則陳顯達王廣之王玄邈沈文季張瓌薛淵等百辟庶僚各奉爾
職謹事太孫勿有懈怠知復何言又詔曰我識滅之後身上著夏
衣畫天衣純烏犀導應諸器悉不得用寶物及織成等唯裝複袂
衣各一本通常所服身刀長短二口鐵環者隨我入梓宮祭敬之
典本在因心東隣殺牛不如西家禴祭我靈上慎勿以牲爲祭唯
設餅茶飲干飯酒脯而已天下貴賤咸同此制未山陵前朔望設

菜食陵墓萬世所宅意嘗恨休安陵未稱今可用東三處地最東
邊以葬我名爲景安陵喪禮每存省約不須煩民百官停六時入
臨朔望祖日可依舊諸王六宮竝不須從山陵內殿鳳華壽昌耀
靈三處是吾所治製夫貴有天下富兼四海宴處寢息不容乃陋
謂此爲奢儉之中慎勿壞去顯揚殿玉像諸佛及供養具如別牒
可盡心禮拜供養之應有功德事可專在中自今公私皆不得出
家爲道及起立塔寺以宅爲精舍竝嚴斷之唯年六十必有道心
聽朝賢選序已有別詔諸小小賜乞及閣內處分亦有別牒內外
禁衛勞舊王帥左右悉付蕭謙○宋本諱優量驅使之勿負吾遺意也是日
上崩年五十四上剛毅有斷爲治總大體以富國爲先不喜遊宴
雕綺之事言常恨之未能頻遣臨崩又詔諸凡遊費宜從休息自
今遠近薦獻務存節儉不得出界營求相高奢麗金粟繒纈弊民

已多珠玉玩好傷工尤重嚴加禁絕不得有違准繩九月丙寅葬

景安陵

史臣曰世祖南面嗣業功參寶命雖爲繼體事實艱難御袞垂旒
深存政典文武授任不革舊章明罰厚恩皆由上出義兼長遠莫
不肅然外表無塵內朝多豫機事平理職貢有恒府藏內充民鮮
勞役宮室苑囿未足以傷財安樂延年衆庶所同幸若夫割愛懷
抱同彼甸人太祖羣昭位後諸穆昔漢武留情晚悟追恨吳園魏
文侯克中山不以封弟英賢心迹臣所未詳也

贊曰武帝不顯徽號止戈韶嶺歇侵彭派澄波威承景曆肅御金
科北懷戎款南獻夷歌市朝晏逸中外寧和

宋本作如

南齊書卷三 本紀第三終

西川忠鳳堂
氏閣印甫

南齊書卷四

本紀第四

鬱林王

西川忠鳳堂
氏閣印甫

鬱林王昭業字元尚文惠太子長子也小名法身世祖卽位封南郡王二千戶永明五年十一月戊子冠於東宮崇政殿其日小會賜王公以下帛各有差給昭業扶二人七年有司奏給班劍二十人鼓吹一部高選友學十一年給阜輪三望車詔高選國官文惠太子薨立昭業爲皇太孫居東宮世祖崩太孫卽位八月壬午詔稱先帝遺詔以護軍將軍武陵王暉爲衛將軍征南大將軍陳顯達卽本號並開府儀同三司尚書左僕射西昌侯本傳爲尚書令太孫詹事沈文季爲護軍將軍癸未以司徒竟陵王子良爲太傅詔曰朕以寡薄嗣膺寶政對越靈命欽若前圖思所以敬守成規拱

揖羣后哀荒在日有憺大猷宜育德振民光昭睿範凡通三調及
衆債在今年七月三十日前悉同蠲除其備償封籍貨鬻未售亦
皆還主御府諸署池田邸冶興廢公事本施一時於今無用者詳
所罷省公宜權禁一以還民關市征賦務從優減丙戌詔曰近北
掠餘口悉充軍實刑固無小罔或攸赦撫辜興仁事深膺範宜從
蕩宥許以自新可一同放遣還復民籍已賞賜者亦皆爲贖辛丑
詔曰徃歲蠻虜協謀志擾邊服羣帥授略大殲凶醜革城克捷及
舞陰固守二處勞人未有沾爵賞者可分遣選部徃彼序用九月
癸丑詔東西二省府國長屯所積財單祿寡良以矜懷選部可甄
才品能推校年月邦守邑丞隨宜量處以貧爲先辛酉追尊文惠
皇太子爲世宗文皇帝冬十月壬寅尊皇太孫太妃爲皇太后立
皇后何氏十一月辛亥立臨汝公昭文爲新安王曲江公昭秀爲

臨海王皇弟昭粲爲永嘉王

隆昌元年春正月丁未改元大赦加太傅竟陵王子良殊禮驍騎
將軍晉熙王鈺爲郢州刺史丹陽尹安陸王子敬爲南兗州刺史
征北大將軍晉安王子懋爲江州刺史臨海王昭秀爲荊州刺史
永嘉王昭粲爲南徐州刺史征南大將軍陳顯達進號車騎大將
軍郢州刺史建安王子真爲護軍將軍詔百僚極陳得失又詔王
公以下各舉所知戊申以護軍將軍沈文季爲領軍將軍己酉以
前將軍曹虎爲雍州刺史右衛將軍薛淵爲司州刺史庚戌以寧
朔將軍蕭懿爲梁南秦二州刺史輔國長史申希祖爲交州刺史
辛亥車駕祠南郊詔曰執耜暨忘懸磬比室秉機或惰無褐終年
非怠非荒雖由王道不根不莠實賴民和頃歲多稼無爽遺秉如
積而三登之美未臻萬斯之基尚遠且風土異宜百民舛務刑章

治緒未必同源妨本害政事非一揆冕旒屬念無忘夙興可嚴下
州郡務滋耕殖相畝闢疇廣開地利深樹國本克阜天民又詢訪
獄市博聽謠俗傷風損化各以條聞王者詳爲條格戊午車駕拜
景安陵己巳以新除黃門侍郎周奉叔爲青州刺史二月辛卯車
駕祠明堂夏四月辛巳衛將軍開府儀同三司武陵王曄薨戊子
太傅竟陵王子良薨戊戌以前沙州刺史楊炅爲沙州刺史丁酉
以驃騎將軍廬陵王子卿爲衛將軍尚書右僕射鄱陽王鏘爲驃
騎將軍並開府儀同三司閏月乙丑以南東海太守蕭頴胄爲青
冀二州刺史丁卯鎮軍大將軍本諱卽本號開府儀同三司戊辰以
中軍將軍新安王昭文爲揚州刺史六月丙寅以黃門侍郎王思
遠爲廣州刺史秋七月庚戌以中書郎蕭遙欣爲兗州刺史東莞
太守臧靈智爲交州刺史癸巳皇太后令曰鎮軍車騎左僕射前

將軍領軍左衛衛尉八座自我皇曆啟基受終於宋上曆聖繼軌三
葉重光太祖以神武創業草昧區夏武皇以英明提極經緯天人
文帝以上哲之資體元良之重雖功未被物而德已在民三靈之
眷方永七百之基已固嗣主特鍾沴氣爰表弱齡險戾著於綠車
愚固彰於崇正狗馬是好酒色方酒所務唯鄙事所疾唯善人世
祖慈愛曲深每加容掩冀年志稍改立守神器自入纂鴻業長惡
滋甚居喪無一日之哀縗絰爲歡宴之服昏酣長夜萬機斯壅發號
施令莫知所從闔豎徐龍駒專總樞密奉叔珍之互執權柄自以
爲任得其人表裏緝穆邁蕭曹而愈信布倚太山而坐平原於是
恣情肆意罔顧天顯二帝姬嬪並充寵御二宮遺服皆納玩府內
外混漫男女無別丹屏之北爲酤鬻之所青圃之上開桑中之肆
又微服潛行信次忘反端委以朝虛位交戟而守空宮積句矣宰

輔忠賢盡誠奉主誅鋤羣小冀能悛革曾無克已更深怨憾公卿
股肱以異已寘戮文武昭穆以德譽見猜放肆醜言將行屠膾社
稷危殆有過綴旒昔太宗克光於漢世簡文代興於晉氏前事之
不忘後人之師也鎮軍居正體道家國是賴伊霍之舉實寄淵謨
便可詳依舊典以禮廢黜中軍將軍新安王體自文皇睿哲天秀宜
入嗣鴻業永寧四海外卽以禮奉迎未亡人屬此多難投筆增慨
昭業少美容止好隸書世祖敕皇孫手書不得妄出以貴重之進
對音吐甚有令譽王侯五日一問訊世祖嘗獨呼昭業至幄座別
加撫問呼爲法身鍾愛甚重文惠皇太子薨昭業每臨哭輒號咷
不自勝俄爾還內歡笑極樂在世祖喪哭泣竟入後宮嘗列胡妓
二部夾閣迎奏爲南郡王時文惠太子禁其起居節其用度昭業
謂豫章王妃庾氏曰阿婆佛法言有福德生帝王家今日見作天

王便是大罪左右主帥動見拘執不如作市邊屠酤富兒百倍矣
及卽位極意賞賜動百數十萬每見錢輒曰我昔時思汝一文不
得今得用汝未朞年之間世祖齋庫儲錢數億垂盡開王衣庫與
皇后寵姬觀之給閹人豎子各數人隨其所欲恣意輦取取諸寶
器以相剖擊破碎之以爲笑樂居嘗裸袒著紅縠禪雜彩相服好
鬪雞密買雞至數千價世祖御物甘草杖宮人寸斷用之毀世祖
招婉殿乞閹人徐龍駒爲齋龍駒尤親幸爲後閣舍人日夜在六
官房內昭業與文帝幸姬霍氏淫通龍駒勸長留宮內聲云慶霍
氏爲尼以餘人代之嘗以邪諂自進每謂人曰古時亦有監作三
公者皇后亦淫亂齋閣通夜洞開內外淆雜無復分別中書舍人
綦母珍之朱隆之直閣將軍曹道剛周奉叔並爲帝羽翼高宗屢
諫不納先啟誅龍駒次誅奉叔及珍之帝並不能違旣而尼媪外

入頗傳異語乃疑高宗有異志中書令何胤以皇后從叔見親使直殿省嘗隨后呼胤爲三父與胤謀誅高宗令胤受事胤不敢當依違杜諫帝意復止乃謀出高宗於西州中敕用事不復關諮高宗慮變定謀廢帝二十二日壬辰使蕭詵坦之等於省誅曹道剛朱隆之等率兵自尚書入雲龍門戎服加朱衣於上比入門三失履王晏徐孝嗣蕭坦之陳顯達王廣之沈文季係進帝在壽昌殿聞外有變使閉內殿諸房閣令閣人登興光樓望還報云見一人戎服從數百人急裝在西鍾樓下須臾蕭詵領兵先入宮截壽昌閣帝走向愛姬徐氏房拔劍自刺不中以帛纏頸輿接出延德殿詵初入殿宿衛將士皆操弓楯欲拒戰詵謂之曰所取自有入卿等不須動宿衛信之及見帝出各欲自奮帝竟無一言出西弄殺之時年二十一輿尸出徐龍駒宅殯葬以王禮餘黨亦見誅

史臣曰鬱林王風華外美衆所同惑伏情隱詐難以覓求立嫡以長未知瑕豐世祖之心不變周道旣而誓鄙內作兆自宮闈雖爲害未遠足傾社稷春秋書梁伯之過言其自取亡也
贊曰十誓有一無國不失鬱林負荷棄禮亡律

南齊書

本紀第五

東西二省府國長老一本長字作屯疑

齊川中鳳圖
氏備國南甫

南齊書卷五

本紀第五

海陵王

齊川中鳳圖
氏備國南甫

海陵恭王昭文字季尚文惠太子第二子也永明四年封臨汝公
 邑千五百戶初為輔國將軍濟陽太守十年轉持節督南豫州諸
 軍事南豫州刺史將軍如故十一年進號冠軍將軍文惠太子薨
 還都鬱林王即位為中軍將軍領兵置佐封新安王邑二千戶隆
 昌元年為使持節都督揚南徐二州諸軍事揚州刺史將軍如故
 其年鬱林王廢尚書令西昌侯齊書本傳議立昭文為帝延興元年秋七
 月丁酉即皇帝位以尚書令鎮軍大將軍西昌侯齊書本傳為驃騎大
 將軍錄尚書事揚州刺史宣城郡公詔曰大祖高皇帝英謀光大
 受命作齊世祖武皇帝猷冠世繼暉下武世宗文皇帝清明懿鑠

四海宅心並德漏下泉功昭上象聲教所覃無思不洽洪基式固
景祚方融而天步多阻運鍾否剝嗣君昏忍暴戾滋多棄侮天經
悖滅人紀朝野重足遐邇側視民怨神恫宗祧如綴賴忠謨蕭舉
霄漢廓清俾三后之業絕而更紐七百之慶危而復安猥以冲人
入纂乾緒載懷馭朽若隆諸淵思與黎元共綏戩福大赦改元文
武賜位二等八月甲辰以新除衛尉蕭湛為中領軍司空王敬則
進位太尉新除車騎大將軍陳顯達為司空尚書左僕射王晏為
尚書令左衛將軍王廣之為豫州刺史驃騎大將軍鄱陽王鏘為
司徒詔遣大使巡行風俗丁未詔曰新安國五品以上悉與滿叙
自此以下皆聽解遣其欲仕者適其所樂以驍騎將軍河東王鉉
為南徐州刺史西中郎將臨海王昭秀為車騎將軍南徐州刺史
永嘉王昭粲為荊州刺史戊申以輔國將軍王詡為廣州刺史中

書郎蕭遙欣為兗州刺史庚戌以車騎板行參軍李慶綜為寧州
刺史辛亥以安西將軍王玄邈為中護軍新除後軍司馬蕭誕為
徐州刺史壬子以冠軍將軍司馬臧靈智為交州刺史乙卯申明
織成金薄綵花錦繡履之禁九月癸酉詔曰頃者以淮關徭戍勤
瘁於行役故覃以榮階薄酬厥勞勲狀淹留未集王府非所以急
舍爵之典趣報功之旨便可分遣使部往彼銓用辛巳以前九真
太守宋慈明為交州刺史癸未誅新除司徒鄱陽王鏘中軍大將
軍隨郡王子隆遣平西將軍王廣之誅南兗州刺史安陸王子敬
於是江州刺史晉安王子懋起兵遣中護軍王玄邈討之乙未驃
騎大將軍口變多采本諱假黃綬內外纂嚴又誅湘州刺史南平王銳郢州刺
史晉熙王鈿南豫州刺史宜都王鏗丁亥以衛將軍廬陵王子卿
為司徒撫軍將軍桂陽王鑠為中軍將軍開府儀同三司冬十月

癸巳詔曰周設媒官趣及時之制漢務輕徭在休息之典所以布德弘教寬俗阜民朕君制八紘志敷九德而習俗之風爲弊未改靜言多愠無忘昏昊督勸婚嫁宜嚴更申明必使禽幣以時標梅息怨正廚諸役舊出州郡徵吏民以應其數公獲一旬私累數朔又廣陵年常遞出千人以助淮戍勞擾爲煩抑亦苞苴是育今並可長停別量所出諸縣使村長路都防城直縣爲劇尤深亦宜禁斷丁酉解嚴進驃騎大將軍揚州刺史宣城公增○本爲太傅領大將軍揚州牧加殊禮進爵爲王戊戌誅新除中軍將軍桂陽王鑠撫軍將軍衡陽王鈞侍中祕書監江夏王鋒鎮軍將軍建安王子真左將軍巴陵王子倫癸卯以寧朔將軍蕭遙欣爲豫州刺史新除黃門郎蕭遙昌爲郢州刺史輔國將軍蕭誕爲司州刺史宣城王輔政帝起居皆諮而後行思食蒸魚菜太官令答無錄公命竟不與

辛亥皇太后令曰司空後將軍丹陽尹右僕射中領軍八座夫明晦迭來屯平代有上靈所以睠命億兆所以歸懷自皇家淳耀列聖繼軌諸侯官方百神受職而殷憂時啟多難薦臻隆昌失德特奈人鬼非徒四海解體乃亦九鼎將移賴天縱英輔大臣社稷崩基重造墜典再興嗣主幼冲庶政多昧且早嬰疴疾弗克負荷所以宗正內侮戚藩外叛覘天視地人各有心雖二祖之德在民而七廟之危行及自非樹以長君鎮以淵器未允天人之望寧息奸宄之謀太傅宣城王胤體宣皇鍾慈太祖識冠生民功高造物符表夙著謳頌有在宜入承寶命式寧宗祐帝可降封海陵王吾當歸老別館昔宣帝中興漢室簡文重延晉祀庶我鴻基於茲永固言念家國感慶載懷建武元年詔海陵王依漢東海王彊故事給虎賁旄頭畫輪車設鍾虞官縣供奉所須每存隆厚十一月稱王

有疾數遣御師占視乃殞之給温明祕器衣一襲斂以衮冕之服
大鴻臚監護喪事葬給輜輶車九旒大輅黃屋左纛前後部羽葆
鼓吹挽歌二部依東海王故事謚曰恭王年十五

史臣曰郭璞稱永昌之名有二日之象而隆昌之號亦同焉案漢
中平六年獻帝即位便改元為光熹張讓段珪誅後改元為昭寧
董卓輔政改元為永漢一歲四號也晉惠帝太安二年長沙王又
事敗成都王穎改元為永安穎自鄴奪河間王顥復改元為永興
一歲三號也隆昌延興建武亦三改年號故知喪亂之軌迹雖千
載而必同矣

贊曰穆穆海陵因亡代興不先不後遭命是膺

南齊書卷五 本紀第五 終

西川屯鳳崗
氏圖南南

南齊書卷六

西川屯鳳崗
氏圖南南

本紀第六

明帝

高宗明皇帝諱鸞字景栖始安貞王道生子也小諱玄度少孤太
祖撫育恩過諸子宋泰豫元年為安吉令有嚴能之名補武陵王
左常侍不拜元徽二年為永世令昇明二年為邵陵王安南記室
參軍未拜仍遷寧朔將軍淮南宣城二郡太守尋進號輔國將軍
太祖踐阼遷侍中封西昌侯邑千戶建元二年為持節督郢州司
州之義陽諸軍事冠軍將軍郢州刺史進號征虜將軍世祖即位
轉度支尚書領右軍將軍永明元年遷侍中領驍騎將軍王子侯
舊乘纏帷車高宗獨乘下帷儀從如素士公事混撓販食人擔火
誤燒牛鼻豫章王白世祖世祖笑焉轉為散騎常侍左衛將軍清

道而行上甚悅二年出爲征虜將軍吳興太守四年遷中領軍常侍並如故五年爲持節監豫州郢州之西陽司州之汝南二郡軍事右將軍豫州刺史七年爲尚書右僕射八年加領衛尉十年轉左僕射十二年領右衛將軍世祖遺詔爲侍中尚書令尋加鎮軍將軍給班劍二十人隆昌元年卽本號爲大將軍給鼓吹一部親兵五百人尋又加中書監開府儀同三司鬱林王廢海陵王立爲使持節都督揚南徐二州諸軍事驃騎大將軍錄尚書事揚州刺史開府如故增班劍爲三十人封宣城郡公二千戶鎮東府城給兵五千人錢二百萬布千匹九江作難假黃鉞事寧表送之尋加黃鉞都督中外諸軍事太傅領大將軍揚州牧增班劍爲四十人給幢絡三望車前後部羽葆鼓吹劍履上殿入朝不趨贊拜不名置左右長史司馬從事中郎掾屬各四人封宣城王邑五千戶持

節侍中中書監錄尚書並如故未拜太后令廢海陵王以上入纂

太祖爲第三子羣臣三請乃受命

建武元年冬十月癸亥卽皇帝位詔曰皇齊受終建極握鏡臨宸神武重輝欽明懿鑠七百攸長盤石斯固而王度中蹇天階薦阻嗣命多違蕃豐孔棘宏圖景曆將墜諸淵宣德皇后遠鑒崇替憲章舊典疇咨台揆允定靈策用集賓命於予一人猥以虛薄纘承大業仰繫鴻丕顧臨兆民永懷先構若履春冰寅憂夕惕罔識攸濟思與萬國播此惟新大赦天下改元宿衛身普轉一階其餘文武賜位二等逋租宿責換負官物在建武元年以前悉原除劫賊餘口在臺府者可悉原放負豐流徙竝還本鄉太尉王敬則爲大司馬司空陳顯達爲太尉尚書令王晏加驃騎大將軍中領軍蕭湛爲領軍將軍南徐州刺史皇子寶義爲揚州刺史中護軍王玄

邈爲南兗州刺史新除右將軍張瓌爲右光祿大夫平北將軍王
廣之爲江州刺史乙丑詔斷遠近上禮丁卯詔自今雕文篆刻歲
時光新可悉停省蕃牧守宰或有薦獻事非任土嚴加禁斷追贈
安陸昭侯緬爲安陸王己巳以安陸侯子寶暉爲湘州刺史詔曰
頃守職之吏多違舊典存私害公實興民蠹今商旅稅石頭後渚
及夫鹵借倩一皆停息所在凡厥公宜可卽符斷主曹詳爲其制
憲司明加聽察十一月癸酉以西中郎長史始安王遙光爲揚州
刺史晉壽太守王洪範爲青冀二州刺史尚書令王晏領太子少
傅甲戌大司馬尋陽公王敬則等十三人進爵邑各有差詔省新
林苑先是民地悉以還主原責本直庚辰立皇子寶義爲晉安王
寶玄爲江夏王寶源爲廬陵王寶實爲建安王寶融。宋本諱。爲隨郡王寶攸
爲南平王甲申詔曰邑宰祿薄俸微不足代耕雖任土恒貢亦爲

勞費自今悉斷又詔宣城國五品以上悉與滿叙自此以下皆聽
解遣其欲仕適所樂乙酉追尊始安貞王爲景皇妃爲懿后丙戌
以輔國將軍聞喜公遙欣爲荊州刺史寧朔將軍豐城公遙昌爲
豫州刺史丁亥詔細作中署材官車府凡諸工可悉開番假遞令
休息戊子立皇太子寶卷賜天下爲父後者爵一級孝子順孫義
夫節婦普加甄賜明揚表其衡閭賚以束帛己丑詔東宮肇建遠
近或有慶禮可悉斷之壬辰以新除征虜將軍江夏王寶玄爲郢
州刺史永明中御史中丞沈淵表百官年登七十皆令致仕竝窮
困私門庚子詔曰日者百司耆齒許以自陳東西二省猶沾微俸
辭事私庭榮祿兼謝興言愛老實有矜懷自縉紳年及可一遵永
明七年以前銓叙之科上輔政所誅諸王是月復屬籍各封子爲
侯十二月壬子詔曰上覽易遺下情難達是以甘棠見美肺石流

詠自月一視黃辭如有含枉不申懷直未舉者莅民之司竝任厥失

二年春正月辛未詔京師繫囚殊死可降爲五歲刑三署見徒五歲以下悉原赦王公以下各舉所知隨王公卿士內外羣僚各舉朕違肆心極諫索虜寇司豫徐梁四州壬申遣鎮南將軍王廣之督司州征討右衛將軍蕭坦之督徐州征討尚書右僕射沈文季督豫州征討己卯詔京師二縣有毀發墳壙隨宜脩理又詔曰食惟民天義高姬載蠶實生本教重軒經前哲盛範後王茂則布令審端成必由之朕肅晨巖廊思引風訓深務八政永鑒在勤靜言日晏無忘寢興守宰親民之主牧伯調俗之司宜嚴課農桑罔令游惰揆景肆力必窮地利固脩堤防考校殿最若耕蠶殊衆具以名聞游怠害業卽便列奏王者詳爲條格乙未虜攻鍾離徐州刺

史蕭惠休破之丙申加太尉陳顯達使持節都督西北征討諸軍事丁酉內外纂嚴三月戊申詔南徐州僑舊民丁多充戎旅蠲今年三課己未司州刺史蕭誕與衆軍擊虜破之詔雍豫司南兗徐五州遇寇之家悉停今年稅調其與虜交通不問徃罪丙寅停青州麥租虜自壽春退走甲申解嚴夏四月己亥朔三百里內獄訟同集京師克日聽覽此以外委州郡訊察三署徒隸原遣有差索虜圍漢中梁州刺史蕭懿拒退之己未以新除黃門郎裴叔業爲徐州刺史五月甲午寢廟成詔監作長帥可賜位一等役身遣假一年非役者蠲租同假限六月壬戌誅領軍將軍蕭湛西陽王子明南海王子罕邵陵王子貞乙丑以右衛將軍蕭坦之爲領軍將軍秋七月辛未以右將軍晉安王寶義爲南徐州刺史壬申以冠軍將軍梁王爲司州刺史辛卯以氏揚馥之爲北秦州刺史仇池

公八月丁未以右衛將軍廬陵王寶源爲南兗州刺史庚戌以新除輔國將軍申希祖爲兗州刺史九月己丑改封南平王寶攸爲邵陵王蜀郡王子文爲西陽王廣漢王子峻爲衡陽王臨海王昭秀爲巴陵王永嘉王昭粲爲桂陽王冬十月丁卯詔曰軌世去奢事殷哲后訓物以儉理鏡前王朕屬流弊之末襲澆浮之季雖恭已弘化刻意隆平而禮讓未興侈華猶競永覽玄風兢言集愧思所以還淳改俗反古移民可罷東田毀興光樓并詔水衡量省御乘乙卯納皇太子妃褚氏大赦王公已下班賜各有差斷四方上禮十二月丁酉詔曰舊國都邑望之悵然況乃自經南面負扆宸居成功濟當時德軍一世而瑩壘積穢封樹不脩豈直嗟深牧豎悲甚信陵而已哉昔中京淪覆鼎玉東遷晉元締構之始簡文遺詠在民而松門夷替埏路榛蕪雖年代殊往撫事興懷晉帝諸陵

悉加脩理并增守衛吳晉陵二郡失稔之鄉蠲三調有差

三年春正月丁酉以陰平王楊昺子崇祖爲沙州刺史封陰平王北中郎將建安王寶寅爲江州刺史己巳詔申明守長六周之制乙酉詔去歲索虜寇邊緣諸州郡將士有臨陣及疾病死亡者並送還本土三月壬午詔車府乘輿有金銀飾校者皆剔除夏四月虜寇司州戍兵擊破之五月己巳以征虜將軍蕭懿爲益州刺史前軍將軍陰廣宗爲梁南秦二州刺史前新除寧州刺史李慶宗爲寧州刺史秋九月辛酉以冠軍將軍徐玄慶爲兗州刺史冬十月以輔國將軍申希祖爲司州刺史閏十二月戊寅皇太子冠賜王公以下帛各有差爲父後者賜爵一級斷遠近上禮又詔今歲不須光新可以見錢爲百官供給

四年春正月庚午大赦詔曰嘉肴停俎定方旨於必甘良玉在攻

表瑋璋於既就是以陶鈞萬品務本爲先經緯九區學敷爲大往
因時康崇建庠序屯虞薦有權從省廢謳誦寂寥後移年稔永言
古昔無忘肝吳今華夏又安要荒慕嚮締修東序寔允適時便可
式依舊章廣延國胄弘敷景業光被後昆壬寅詔民產子者蠲其
父母調役一年又賜米十斛新婚者蠲夫役一年丙辰尚書令王
晏伏誅二月甲子以左僕射徐孝嗣爲尚書令征虜將軍蕭季敞
爲廣州刺史三月乙未右僕射沈文季領護軍將軍秋八月追尊
景皇所生王氏爲恭太后索虜寇沔北冬十月又寇司州甲戌遣
太子中庶子梁王右軍司馬張稷討之十一月丙辰以氏楊靈珍
爲北秦州刺史仇池公武都王丁亥詔所在結課屋宅田桑可詳
減舊價十二月甲子以冠軍將軍裴叔業爲豫州刺史冠軍將軍
徐玄慶爲徐州刺史寧朔將軍左興盛爲兗州刺史丁丑遣度支

尚書崔慧景率衆救雍州

永泰元年春正月癸未朔大赦逋租宿債在四年之前皆悉原除
中軍大將軍徐孝嗣卽本號開府儀同三司沔北諸郡爲虜所侵
相繼敗沒乙巳遣太尉陳顯達持節救雍州丁未誅河東王鉉臨
賀王子岳西陽王子文衡陽王子峻南康王子琳永陽王子珉湘
東王子建南郡王子夏桂陽王昭粲巴陵王昭秀二月癸丑遣左
衛將軍蕭惠休假節援壽陽辛未豫州刺史裴叔業擊虜於淮北
破之辛巳平西將軍蕭遙欣領雍州刺史三月丙午蠲雍州遇虜
之縣租布戊申詔曰仲尼明聖在躬允光上哲弘厥雅道大訓生
民師範百王軌儀千載立人斯仰忠孝攸出玄功潛被至德彌闡
雖反袂遐曠而祧薦靡闕時祭舊品秩比諸侯須歲以來祀典陵
替俎豆寂寥牲奠莫舉豈所以克昭盛烈水隆風教者哉可式循

舊典詳復祭秩使宰餼備禮欽饗兼申夏四月甲寅改元赦三署
囚繫原除各有差文武賜位二等丙戌以鎮軍將軍蕭坦之爲侍
中中領軍已未立武陵昭王子子坦爲衡陽王丙寅以西中郎長
史劉暄爲郢州刺史丁卯大司馬會稽太守王敬則舉兵反五月
壬午遣輔國將軍劉山陽率軍東討乙酉斬敬則傳首曲赦浙東
吳晉陵七郡以後軍長史蕭領官爲南兗州刺史下西以北中郎
將司馬元和爲兗州刺史秋七月以輔國將軍王珍國爲青冀二
州刺史癸卯以太子中庶子梁王爲雍州刺史太尉陳顯達爲江
州刺史己酉帝崩正福殿年四十七遺詔曰徐令可重申八命中
書監本官悉如故沈文季可左僕射常侍護軍如故江祏可右僕
射江祀可侍中劉暄可衛尉軍政大事委陳大尉內外衆事無大
小委徐孝嗣遙光坦之江祏其大事與沈文季江祀劉暄參懷心

替之任可委劉悛蕭惠休崔惠景葬興安陵帝明審有吏才持法

無所借制御親幸自

北齊本
作臣

下肅清驅使寒人不得用四幅織大存

儉約罷世祖所起新林苑以地還百姓廢文帝所起太子東田斥
賣之永明中輿輦舟乘悉剔取金銀還主衣庫太官進御食有裹
蒸帝曰我食此不盡可四片破之餘充晚食而世祖掖庭中宮殿
服御一無所改性猜忌多慮故亟行誅戮潛信道術用計數出行
幸先占利害南出則唱云西行東遊則唱云北幸簡於出入竟不
南郊上初有疾無輟聽覽祕而不傳及寢疾甚久敕臺府署文
簿求白魚以爲治外始知之身衣絳衣服飾皆赤以爲厭勝巫覡
云後湖水頭經過宮內致帝有疾帝乃自至太官行水溝左右啟
太官若無此水則不立帝決意塞之欲南引淮流會崩事寢
史臣曰高宗以支庶纂曆據猶子而爲論一朝到此誠非素心遺

寄所當諒不獲免夫戕夷之事懷抱多端或出自雄忍或生乎畏
懾令同財之親在我而先奔進引之愛量物其必違疑怯既深猜
似外入流涕行誅非云義舉事苟求安能無內愧既而自樹本根
枝胤孤弱貽厥不昌終覆宗社若令壓鈕之微必委天命盤庚之
祀亦繼陽甲杖運推公夫何譏爾
贊曰高宗傍起宗國之慶慕名儉德垂文法令兢兢小心察察吏
政沔陽失土南風不競

南齊書卷六

本紀第六終

齊川屯鳳
氏圖南南

南齊書卷七

本紀第七

齊川屯鳳
氏圖南南

東昏侯

東昏侯寶卷字智藏高宗第二子也本名明賢高宗輔政後改焉
建武元年立為皇太子永泰元年七月己酉高宗崩太子即位八
月丁巳詔雍州將士與虜戰死者復除有差又詔辨括選序訪搜
貧屈庚申鎮北將軍晉安王寶義進號征北大將軍開府儀同三
司南中郎將建安王寶寅為郢州刺史冬十月己未詔刪省科律
十一月戊子立皇后褚氏賜王公以下錢各有差

永元元年春正月戊寅大赦改元詔研策秀孝考課百司辛卯車
駕祠南郊詔三品清貧官以上應食祿者有二親或祖父母年登
七十並給見錢癸卯以冠軍將軍南康王寶融為荊州刺史二月癸

丑以北中郎將邵陵王寶攸爲南兗州刺史是月太尉陳顯達敗績於馬圈夏四月己巳立皇太子誦大赦賜民爲父後爵一級甲戌以寧朔將軍柳惔爲梁南秦二州刺史五月癸亥以撫軍大將軍始安王遙光爲開府儀同三司六月己酉新除右衛將軍崔惠景爲護軍將軍癸亥以始興內史范雲爲廣州刺史甲子詔原雍州今年三調秋七月丁亥京師大水死者衆詔賜死者材器并賑卹八月乙巳蠲京邑遇水資財漂蕩者今年調稅又詔爲馬圈戰亡將士舉哀丙午楊州刺史始安王遙光據東府反詔曲赦京邑中外戒嚴尚書令徐孝嗣以下屯衛宮城遣領軍將軍蕭坦之率六軍討之戊午斬遙光傳首己未以征北大將軍晉安王寶玄爲南徐兗二州刺史己巳尚書令徐孝嗣爲司空右衛將軍劉暄爲領軍將軍閏月丙子以江陵公寶覽爲始安王虜僞東徐州刺史

沈陵降以爲北徐州刺史九月丁未以輔國將軍裴叔業爲兗州刺史征虜長史張沖爲豫州刺史壬戌以頻誅大臣大赦天下辛未以太子詹事主瑩爲中領軍冬十月乙未誅尚書令新除司空徐孝嗣右僕射新除鎮軍將軍沈文季乙巳以始興內史顏翻爲廣州刺史征虜將軍沈陵爲越州刺史十一月丙辰太尉江州刺史陳顯達舉兵於尋陽乙丑護軍將軍崔慧景加平南將軍督衆軍南討事丙寅以冠軍將軍王鴻爲徐州刺史十二月癸未以前輔國將軍楊集始爲秦州刺史甲申陳顯達至京師宮城嚴警六軍固守乙酉斬陳顯達傳首丁亥以征虜將軍邵陵王寶攸爲江州刺史

二年春正月壬子以輔國將軍張沖爲南兗州刺史庚午詔討豫州刺史裴叔業二月癸未以黃門郎蕭寅爲司州刺史丙戌以衛

尉蕭懿為豫州刺史征壽春己丑裴叔業病死兄子植以壽春降虜三月癸卯以輔國將軍張沖為司州刺史乙卯遣平西將軍崔慧景率眾軍伐壽春夏四月丁未以新除冠軍將軍張沖為南兗州刺史崔慧景於廣陵舉兵襲京師壬子右衛將軍左典盛督京邑水步眾軍南徐州刺史江夏王寶玄以京城納慧景乙卯遣中領軍王瑩率眾軍屯北籬門壬戌慧景至瑩等敗績甲子慧景入京師宮內據城拒守豫州刺史蕭懿起義救援癸酉慧景棄眾走斬首詔赦京邑南徐兗二州乙亥以新除尚書右僕射蕭懿為尚書令丙子以晉熙王寶嵩為南徐州刺史五月乙巳以虜偽豫州刺史王肅為豫州刺史戊申以桂陽王寶貞為中護軍己酉江夏王寶玄伏誅壬子大赦乙丑曲赦京邑南徐兗二州戊辰以始安王寶覽為湘州刺史六月庚寅車駕於樂遊苑內會如三元京

邑女人放觀戊戌以新除冠軍將軍張沖為郢州刺史守五兵尚書陸慧曉為南兗州刺史秋七月甲辰以驃騎司馬張稷為北徐州刺史八月丁酉以新除驃騎司馬陳伯之為豫州刺史甲申夜宮內火冬十月己卯害尚書令蕭懿十一月辛丑以寧朔將軍張稷為南兗州刺史甲寅西中郎長史蕭穎胄起義兵於荊州十二月雍州刺史梁王起義兵於襄陽戊寅以冠軍長史劉繪為雍州刺史

三年春正月丙申朔合朔時加寅漏上八刻事畢宮人於闕武堂元會皇后正位闈人行儀帝戎服臨視丁酉以驃騎大將軍晉安王寶義為司徒新除撫軍將軍建安王寶寅為車騎將軍開府儀同三司甲辰以寧朔將軍王珍國為北徐州刺史辛亥車駕祠南郊詔大赦天下百官陳讜言二月丙寅訖和殿西廂火壬午詔遣

羽林兵征雍州中外纂嚴乙酉以威烈將軍胡元進爲廣州刺史
三月己亥以驃騎將軍沈徽孚爲廣州刺史甲辰以輔國將軍張
欣泰爲雍州刺史丁未南康王寶融卽皇位於江陵癸丑遣平西
將軍陳伯之西征六月京邑雨水遣中書舍人二縣官長賑賜有
差蕭穎胄弟穎孚起兵廬陵戊子曲赦江州安成廬陵二郡秋七
月癸巳曲赦荆雍二州甲午雍州刺史張欣泰前南譙太守王靈
秀率石頭文武奉建安王寶寅向臺至杜姥宅宮門閉乃散走已
未以征虜長史程茂爲郢州刺史驍騎將軍薛元嗣爲雍州刺史
是日元嗣以郢州降義師八月丁卯以輔國將軍申胄監豫州事
辛巳光祿大夫張環鎮石頭辛未以太子左率李居士總督西討
諸軍事屯新亭城九月甲辰以居士爲江州刺史新除冠軍將軍
王珍國爲雍州刺史車騎將軍建安王寶寅爲荊州刺史以輔國

將軍申胄監郢州龍驤將軍馬仙理監豫州驍騎將軍徐元稱監
徐州是日義軍至南州申胄軍二萬人於姑熟奔歸戊申以後軍
參軍蕭瓚爲司州刺史前輔國將軍魯休烈爲益州刺史輔國長
史趙越嘗爲梁南秦二州刺史丙辰李居士與義軍戰於新亭敗
績冬十月甲戌王珍國與義軍戰於朱雀桁敗績戊寅寧朔將軍
徐元瑜以東府城降青冀二州刺史桓和入衛屯東宮己卯衆降
光祿大夫張瓌棄石頭還宮於是閉宮城門自守庚辰以驍騎將
軍胡虎牙爲徐州刺史左軍將軍徐智勇爲益州刺史游擊將軍
牛平爲梁南秦二州刺史李居士以新亭降琅邪城主張木亦降
義師築長圍守宮城十二月丙寅新除雍州刺史王珍國侍中張
稷率兵入殿廢帝時年十九帝在東宮便好弄不喜書學高宗亦
不以爲非但勗以家人之行令太子求一日再入朝發詔不許使

三日一朝嘗夜捕鼠達旦以爲笑樂高宗臨崩屬以後事以隆昌爲戒曰作事不可在人後故委任羣小誅諸宰臣無不如意性重澀少言不與朝士接唯親信閹人及左右御刀應敕等自江祐始安王遙光誅後漸便騎馬日夜於後堂戲馬與親近閹人娼妓鼓叫常以五更就臥至晡乃起王侯節朔朝見晡後方前或際閹遣出臺閣案奏月數十日乃報或不知所在二年元會食後方出朝賀裁竟便還殿西序寢自己至申百僚陪位皆僵小菜色比起就會怒遽而罷陳顯達事平漸出遊走所經道路屏逐居民從萬春門由東宮以東至於郊外數十里皆空家盡室巷陌懸幔爲高障置伎人防守謂之屏除或於市肆左側過親幸家環回宛轉周遍京邑每三四更中鼓聲四出幡戟橫路百姓喧走相隨士庶莫辨出輒不言定所東南西北無處不驅人高障之內設部伍羽儀復

復有數部皆奏鼓吹羌胡伎鼓角橫吹夜出晝反火光照天拜愛姬潘氏爲貴妃乘臥輿帝騎馬從後著織成袴褶金薄帽執七寶縛稍戎服急裝不變寒暑陵冒雨雪不避坑穿馳騁渴乏輒下馬解取腰邊蠡器酌水飲之復上馬馳去馬乘具用錦繡處患爲雨所沾濕織雜絲珠爲覆蒙備諸雕巧教黃門五六十人爲騎客又選無賴小人善走者爲逐馬左右五百人常以自隨奔走往來略不暇息置射雉場二百九十六處翳中帷帳及步鄣皆給以綠紅錦金銀鏤弩牙瑇瑁帖箭郊郭四民皆廢業樵蘇路斷吉凶失時乳婦婚姻之家移產寄室或輿病棄屍不得殯葬有棄病人於青溪邊者吏懼爲監司所問推置水中泥覆其面須臾便死遂失骸骨後宮遭火之後更起仙華神仙玉壽諸殿刻畫雕絲青葢金口帶麝香塗壁錦幔珠簾窮極綺麗繫役工匠自夜達曉猶不副速

乃剔取諸寺佛刹殿藻井仙人騎獸以充足之世祖興光樓上施青漆世謂之青樓帝曰武帝不巧何不純用瑠璃潘氏服御極選珍寶主衣庫舊物不復周用貴市民間金銀寶物價皆數倍虎魄釧一隻直百七十萬京邑酒租皆折使輸金以爲金塗猶不能足下楊南徐二州橋桁塘埭丁計功爲直斂取見錢供太樂主衣雜費由是所在塘瀆多有隳廢又訂出雉頭鶴筆白鷺線親幸小人因緣爲奸利課一輸十郡縣無敢言者三年夏於闕武堂起芳樂苑山石皆塗以五采跨池水立紫閣諸樓觀壁上畫男女私褻之像種好樹美竹天時盛暑未及經日便就萎枯於是徵求民家墾樹便取毀徹墻屋以移致之朝裁暮拔道路相繼花藥雜草亦復皆然又於苑中立市太官每旦進酒肉雜肴使宮人屠酤潘氏爲市令帝爲市魁執罰爭者就潘氏決判帝有膂力能擔白虎幢自

製雜色錦伎衣綴以金花玉鏡衆寶逞諸意態所寵羣小黨與三十一人黃門十人初任新蔡人徐世檪爲直閣驍騎將軍凡有殺戮皆其用命殺徐孝嗣後封爲臨汝縣子陳顯達事起加輔國將軍雖用護軍崔慧景爲都督而兵權實在世檪及事平世檪謂人曰五百人軍主能平萬人都督世檪亦知帝昏縱密謂其黨茹法珍梅蟲兒曰何世天子無要人但阿儂貨主惡耳法珍等爭權以白帝帝稍惡其凶強以二年正月遣禁兵殺之世檪拒戰而死自是法珍蟲兒用事竝爲外監口稱詔敕中書舍人王暄之與相脣齒專掌文翰其餘二十餘人皆有勢力崔慧景平後法珍封餘干縣男蟲兒封竟陵縣男及義師起江郢二鎮已降帝遊騁如舊謂茹法珍曰須來至白門前當一決義師至近郊乃聚兵爲固守之計召王侯朝貴分置尚書都座及殿省又信鬼神崔慧景事時拜

蔣子文神爲假黃鉞使持節相國太宰大將軍錄尚書揚州牧鍾山王至是又尊爲皇帝迎神像及諸廟雜神皆入後堂使所親巫朱光尚禱祀祈福以冠軍將軍王珍國領萬人據大桁莫有鬪志遣左右直長闞豎王寶孫督戰呼爲王長子寶孫切罵諸將帥直閤將軍席豪發憤突陣死豪驍將旣弊衆軍於是土崩軍人從朱雀觀上自投及赴淮死者無數於是閉城自守城內軍事委王珍國兗州刺史張稷入衛京師以稷爲副實甲猶七萬人帝烏帽袴褶備羽儀登南掖門臨望又虛設鎧馬齊仗千人皆張弓拔白出東掖門稱蔣王出盪素好鬪軍隊初使宮人爲軍後乃用黃門親自臨陳詐被創使人輿將去至是於閱武堂設牙門軍頗每夜嚴警帝於殿內騎馬從鳳莊門入徽明門馬被銀蓮葉具裝鎧雜羽孔翠寄生逐馬左右衛從晝眠夜起如平常聞外鼓叫聲被大紅

袍登景陽樓屋上望弩幾中之衆皆忌怨不爲致力募兵出戰出城門數十步皆坐甲而歸慮城外有伏兵乃燒城傍諸府署六門之內皆蕩盡城中閣道西掖門內相聚爲市販死牛馬肉帝初與羣小計議陳顯達一戰便敗崔慧景圍城退走謂義師遠來不過旬日亦應散去敕太官辦樵米爲百日糧而已大桁敗後衆情兇懼法珍等恐人衆驚走故閉城不復出軍旣而義師長圍旣立塹柵嚴固然後出盪屢戰不捷帝尤惜金錢不肯賞賜法珍叩頭請之帝曰賊來獨取我邪何爲就我求物後堂儲數百具榜啟爲城防帝云擬作殿竟不與又催御府細作三百人精仗待圍解以擬屏除金銀雕鏤雜物倍急於常王珍國張稷懼禍及率兵入殿分軍又從西上閣入後宮斷之御刀豐勇之爲內應是夜帝在含德殿吹笙歌作女兒子臥未熟聞兵入趨出北戶欲還後宮清曜閣

已閉關人禁防黃泰平以刀傷其膝仆地顧曰奴反邪直後張齊
斬首送梁王宣德太后令曰皇室受終祖宗齊聖太祖高皇帝肇
基駿命膺籙受圖世祖武皇帝係明下武高宗明皇帝重隆景業
咸降年不永宮車係北齊晏皇祚之重禿屬儲元而稟質凶愚發于稚
齒爰自保姆迄至成童恐戾昏頑觸途必著高宗留心正嫡立嫡
惟長輔以羣才閒以賢戚內外維持冀免多難未及暮稔便逞屠
戮密戚近親元勳良輔覆族殲門旬月相係凡所任杖盡慝窮奸
皆營伍屠販容狀險醜身秉朝權手斷國命誅戮無辜納其財產
睚眦之間屠覆比屋身居元首好是賤事危冠短服坐臥以之晨
出夜反無復已極驅斥氓庶巷無居人老細奔遑寘身無所東邁
西屏北出南驅負疾輿屍填街塞陌與築繕造日夜不窮晨構夕
毀朝穿暮塞絡以隨珠方斯已陋飾以璧璜曾何足道時暑赫熾

流金鑠石移竹藝果匪日伊夜根未及植葉已先枯畚鍤紛紜勤
倦無已散費國儲專事浮飾逼奪民財自近及遠兆庶恇恇流冗北齊
道路府帑既竭肆奪市道工商婢販行號道泣屈此萬乘躬自角
抵昂首翹肩逞能撞木觀者如堵曾無忤容芳樂華林竝立闐闐
踞肆鼓刀手銓輕重干戈鼓譟昏曉靡息無戎而城豈足云譬至
於居喪淫讌之愆三年載弄之醜反道違常之豐牝雞晨鳴之慝
於事已細故可得而略也罄楚越之竹未足以言校辛亥之君豈
或能匹征東將軍忠武奮發投袂萬里光奉明聖翊成中興乘勝
席卷掃清京邑而羣小靡識嬰城自固緩戮稽誅倏彌旬月宜速
勦定寧我邦家可潛遣閒介密宣此旨忠勇齊奮遙加蕩撲放斥
昏凶衛送外第未亡人不幸驟此百罹感念存沒心焉如割奈何
奈何又令依漢海昏侯故事追封東昏侯茹法珍梅蟲兒王暄之

等伏誅豐勇之原死

史臣曰漢宣帝時南郡獲白虎獲之者張武言武張而猛服也東昏侯亡德橫流道歸拯亂躬當剪戮實啟太平推闡豎之名字亦天意也

贊曰東昏慢道匹癸方辛乃隳典則乃棄彝倫玩習兵火終用焚身

南齊書卷七

本紀第七終

西川屯鳳園
氏書

南齊書卷八

本紀第八

和帝

西川屯鳳園
氏書

和帝諱寶融字智昭高宗第八子也建武元年封隨郡王邑二千戶三年為冠軍將軍領石頭戍軍事永元元年改封南康王為持節督荆雍益寧梁南北秦七州軍事西中郎將荆州刺史二年十一月甲寅長史蕭穎胄殺輔國將軍巴西梓潼二郡太守劉山陽奉梁王舉義乙卯教纂嚴又教曰吾躬率晉陽剪此凶孽戎事方勤宜覃澤惠所領內繫囚見徒罪無輕重殊死已下皆原遣先有位署即復本職將吏轉一階從征身有家口停鎮給廩食凡諸雜役見在諸軍帶甲之身克定之後悉免為民其功效賞報別有科條丙辰以雍州刺史梁王為使持節都督前鋒諸軍事左將軍丁

已以蕭穎胄為右將軍都督行留諸軍事戊午梁王上表勸進十
二月乙亥羣僚勸進竝不許壬辰驍騎將軍夏侯亶自京師至江
陵稱宣德太后令西中郎將南康王宜纂承皇祚光臨億兆方俟
清宮未卽大號可且封宣城南琅邪南東海東陽臨海新安尋陽
南郡竟陵宜都十郡為宣城王相國荊州牧加黃鉞置僚屬選百
官西中郎府南康國竝如故須軍次近路主者詳依舊典法駕奉
迎三年正月乙巳王受命大赦唯梅蟲兒茹法珍等不在赦例右
將軍蕭穎胄為左長史進號鎮軍將軍梁王進號征東將軍甲戌
以冠軍將軍楊公則為湘州刺史甲寅建牙子城南二月乙丑以
冠軍長史王茂先為江州刺史冠軍將軍曹景宗為郢州刺史右
將軍邵陵王寶攸為荊州刺史巳巳羣僚上尊號立宗廟及南北
郊甲申梁王率大眾屯沔口郢州刺史張沖拒守三月丁酉張沖

死驃騎將軍薛元嗣等固城

中興元年春三月乙巳卽皇帝位大赦改元文武賜位二等鰥寡
孤獨不能自存者穀人五斛卽永元三年也以相國左長史蕭穎
胄為尚書令晉安王寶義為司空廬陵王寶源為車騎將軍開府
儀同三司建安王寶寅為徐州刺史散騎常侍夏侯詳為中領軍
領軍將軍蕭偉為雍州刺史丙午有司奏封庶人寶卷為零陽侯
詔不許又奏為涪陵王詔可乙酉尚書令蕭穎胄行荊州刺史假
梁王黃鉞壬子以征虜將軍柳惔為益寧二州刺史巳未以冠軍
將軍莊丘黑為梁南秦二州刺史冠軍將軍鄧元起為廣州刺史
夏四月戊辰詔曰荆雍義舉所基實始王述君子勞心細人盡力
宜加酬獎副其乃誠凡東討眾軍及諸嚮義之眾可普復除五月
乙卯車駕幸竹林寺禪房宴羣臣巴西太守魯休烈巴東太守蕭

惠訓子瓚拒義軍秋七月東軍王吳子陽十二軍救郢州屯加湖
丁酉征虜將軍王茂先擊破之辛亥以茂先爲中護軍丁卯魯山
城主孫樂祖以城降己未郢城主薛元嗣降八月丙子平西將軍
陳伯之降乙卯以伯之爲江州刺史子虎牙爲徐州刺史九月乙
未詔梁王若定京邑得以便宜從事冬十一月乙未以輔國將軍
元履爲豫州刺史壬寅尚書令鎮軍將軍蕭穎胄卒以黃門郎
蕭澹行荊州府州事丁巳蕭瓚魯休烈降十二月丙寅建康城平
己巳皇太后令以梁王爲大司馬錄尚書事驃騎大將軍揚州刺
史封建安郡公依晉武陵王遵承制故事百僚致敬壬申改封建
安王寶寅鄱陽王癸酉以司徒揚州刺史晉安王寶義爲太尉領
司徒甲戌給大司馬錢二千萬布絹各五千匹乙酉以輔國將軍
蕭宏爲中護軍

二年春正月戊戌宣德太后臨朝入居內殿大司馬梁王解承制
致敬如先己亥以寧朔將軍蕭昂監南兗州壬寅以大司馬都督
中外諸軍事加殊禮己酉以大司馬長史王亮爲守尚書令甲寅
詔大司馬梁王進位相國總百揆揚州牧封十郡爲梁公備九錫
之禮加遠遊冠位在諸王上加相國綠綬綬己未以新除右將軍
曹景宗爲郢州刺史二月壬戌湘東王寶暉伏誅戊辰詔進梁公
爵爲梁王增封十郡三月乙未皇太后令給梁國錢五百萬布五
千匹絹千匹辛丑鄱陽王寶寅奔虜邵陵王寶攸晉熙王寶嵩桂陽
王寶貞伏誅甲午命梁王冕十二旒建天子旌旗出警入蹕乘金
根駕六馬備五時副車置旄頭雲罕樂舞八佾設鍾簾宮懸王子
王女爵命一如舊儀庚戌以冠軍長史蕭秀爲南徐州刺史新除
中領軍蔡道恭爲司州刺史車駕東歸至姑熟丙辰禪位梁王丁

已廬陵王寶源薨夏四月辛酉禪詔至皇太后遜外宮丁卯梁王
奉帝爲巴陵王宮於姑熟行齊正朔一如故事戊辰薨年十五追
尊爲齊和帝葬恭安陵
史臣曰夏以桀亡殷隨紂滅郊天改朔理無延世而皇符所集重
興西達神器蹙來雖有冥數微名大號斯爲幸矣
贊曰和帝晚隆掃難清宮達機觀運高頌永終

